

**Ammasumik ataatsimiinnermi oqaluuserisassat:**

- Imm. 01** Oqaluuserisassat akuersissutigineri
- Imm. 02** Borgmesterip nalunaarutaa.
- Imm. 03** Ataatsimiititaliani siulittaasut nalunaarutaat.

**Aningaasaqarnermut tunngasut**

- Imm. 04** Ataatsimiititaliat siulittaasuisa akissarsiassaat.
- Imm. 05** Maniitsumi utoqqarnut inissiassat – immikkut aningaasaliissutit.

**Suliassat nalinginnaasut**

- Imm. 06** Qeqqata Kommunian pillugu kukkunersuisut nalunaarutaat normu 9 aamma 10.
- Imm. 07** Maniitsumut kommunip pilersarusiornerani tapiliusseq nr. 7 inaarutaasumik akuersissutigineqarnera.
- Imm. 08** Innuttaasut Illuata Ilaqutariinnermut pinaveersaartitsinermullu sullissivittut atuutilernissaanut siunnersuut.
- Imm. 09** Kommunip ilaqutariinnut arlalinnut inissiaataanik inissiatut nammineq pigisatut tuniniaanissaq.
- Imm. 10** Aningaasaqarnermut ataatsimiititaliap kommunalbestyrelsillu 2013-imi ataatsimiiffissaannut siunnersuut.
- Imm. 11** Qeqqata kommuniani meeqqat atuarfiisa aqunneqarnerini ileqqoreqqusamut siunnersuut.
- Imm. 12** Nunaqarfinni aqutsisut aqqissuussaani aammalu ilaasortat amerlassusii.
- Imm. 13** Sukisaarsaatigalugu aalisartartunik (eqalunnik) aalisartitsinissamut akuersissuteqartarnerup killiligaanera
- Imm. 14** Imigassanik sassaallersinnaanermut Type B qinnuteqaat – Sanati Service A/S, Butik-Café 61, B-608, Sisimiut.

**Paasissutissiissutit**

- Imm. 15** 2012-mi qipoqqarsinnaanermut akuersissutip kommunip iluani nuunneqarnissaa pillugu aalajangiineq pillugu paasissutissiissut.
- Imm. 16** Inatsisartut peqqussutaata nr. 12-ip, 19. november 2007-imeersup allangortinneqarnissaanik siunnersuutip tusarniutigineqarneranut akissuteqaat pillugu paasissutissiissut.



**Imm. 17 Tamalaat.**



Ataatsimiinneq videokonferenci atorlugu ingerlanneqassaaq aallartissallunilu nal. 8:30

*Peqataasut:*

***Atassut***

***Inuit Ataqaatigiit***

***Siumut***

*Nalunaaruteqarlutik peqataannngitsut:*

*Nalunaaruteqaratik peqataannngitsut*

**Imm. 01 Oqaluuserisassat akuersissutigineri**

**Aalajangiineq**

**Imm. 02 Borgmesterip nalunaarutaa**

**Aalajangiineq**

**Imm. 03 Ataatsimiititaliani siulittaasut nalunaarutaat**

**Aalajangiineq**

#### **Imm. 04 Ataatsimiititaliat siulittaasuisa akissarsiassa**

*Journalnr. 01.02*

##### Tunuliaqutaq

Kukkunersuisut inaarutaasumik oqaaseqaateqarnerminni normu 10-mi maluginiarpaat, ataatsimiititaliat siulittaasuinut 2011-mi minnaarilluni akissarsisitsisoqartarsimasoq. Kukkunersuisut isumaqarput, ataatsimiititaliat januaarip 1-ani 2011-miit arfinilinniit tallimanut ikilineranni kukkussut pilersimassasoq.

##### Maleruagassatigut tunngavissaq

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik il.il. akissarsiaqartitsineq pillugu Namminersorerullutik Oqartussat nalunaarutaat nr. 29, 18. december 2008-meersup ”§ 7. Ataatsimiititaliani siulittaasunut ilassutitut aningaasarsianut kommunip aningaasartuutai tamarmiusut ukiumut amerlanerpaamik akissarsiap § 2, imm. 1-imi taaneqartup affarisinnaavai...”

##### Pissutsit atuuttut

Ukiup tullissaanut missingersuutit ukiut tamaasa akuersissutiginerinut atatillugu, kommunalbestyrelsimi ilaasortat akissarsiassaasa annertussusissaat ilaatigut kommunalbestyrelsip aalajangersartarpaa.

Novembarip 23-ni 2010-mi ataatsimiinnermini kommunalbestyrelsip aalajangerpaa, aqutsinermi ileqqoreqqusap aappassaaneerneranut atatillugu ataatsimiititaliat arfinilinniit tallimanut appartinneqassasut.

Ataatsimiititaliat siulittaasuisa akissarsiassaata ataatsimiititaliat siulittaasuisa amerlassusiinik borgmesterip akissarsiaasa affaanik gangerlugu annerpaaffiligaasumik. Ajoraluartumillu naatsorsuinermi arfinilinnik gangiineq pisimavoq, taamalu ataatsimiititaliat siulittaasuisa sinneri annikinaakkanik akissarsisinneqartarsimallutik.

Akissarsiaqartitsinermi nalunaarut naapertorlugu, akissarsiassat borgmesterip akissarsiaanik aallaavilimmik naatsorsorneqartussaapput, borgmesterillu akissarsiai tjenestemandinut qaammammusiilinnut akissarsiatigut Ilinniagartuut Kattuffiata isumaqatigiinniutigisarlugit. Taamatutaaq akissarsiat ukiut tamaasa apriilip 1-ani iluarsiiiffiusarlutik. Kommunalborgmesterimut akissarsiat tamarmik missiliorlugit aqqitaasimapput iluarsiiiffineqartarsimanatillu, tassa akissarsiat nalinginnaasumik siumut angissusilertarnerat aqutugalugu.

Ajoraluartumillu ataatsimiititalianik ikilisaanissamik aalajangiisoqarmalli, ataatsimiititaliat siulittaasuisa akissarsiaat 2011-miit ulloq manna tikillugu allanngortinneqarsimangillat, tassalu arfinillit aallaavigalugit tallimat aallaavigisussaagalarlugit.

Allaffeqarfik KANUKOKA-p inatsisilerituaanut ataatsimiititaliat siulittaasuisa akissarsiaasa naak kommunalborgmesterimut akuersaarlugit annertussusissaat ilanngullugu akuersissutaareersimagaluit aqqiivigisinaanissat pillugu naliliiffigeqqullugu saaffiginnissuteqarsimavoq. Taamaattoqassappallu kommunalborgmesterimut akuersissutigalugu aalajangiiffioreersimasat eqqarsaatigalugit arlaatigut allaffissornermi inatsisilik eqqortitsisussaannermut sunniuteqassanersoq.

KANUKOKA-p inatsisilerituaa naliliivoq, akissarsiat kingumoortumik aaqqiffigineqarsinnaasut, tassalu ataatsimiititaliat siulittaasui tallimaasut 2011-mi 2012-imilu akissarsiarisimasaat tapisiatigut (tamatumani soorunalimi akissarsiaqartitsinermi nalunaarummi matuma siuliani taaneqartoq § 7 atuutsillugu) qaffaaffigalugit. Kommunalbestyrelsip qanoq akissarsiaqartitsinissamik aalajangiinermini akeq *eqqortoq* akuersissutigisimagaluarpa, peqatigitilluguli kommunalbestyrelsip aalajangiiffigisimavaa, kommunalbestyrelsimi nunaqarfinnilu aqutsisuni ilaasortaasut *periarfissat aqqutigalugit* sapinngisamik annerpaamik akissarsiaqartinneqassasut. Taamaattumik inatsisileritooq naliliivoq, ukioq manna ataatsimiititaliat siulittaasuisa akissarsiaat malittarisassanik unioqutitsinertaqanngitsumik kommunalbestyrelsilluunniit 2011-mi aalajangiineranut akerliunngitsumik aaqqiffigineqarsinnaasut. Aaqqiissuteqarneq kommunalbestyrelsip aalajangiisimaneranik allannguisuussanngilaq, illuatungaatigulli kommunalbestyrelsip siusinnerusukkulli aalajangiinerani killissarititaasut iluanni iluarsisutaassalluni.

Atuilluartuunissakkut kingunerisinnaasai

Ataatsimiititaliat siulittaasuisa akissarsiaasa aaqqiiviginissaat atuilluartuunissakkut kingunerisassa-qanngillaq.

Aningaasaqarnikkut allaffissornikkullu kingunerisinnaasai

Eqitsit 1.

	Ataatsimiititaliat siulittaasuisa akissarsiaanik aaqqiineq		Katillugit
	2012-imi januaarip 1-aniit oktobarip 31-anut	2011-mi januaarip 1-aniit decembarip 31-anut	
TAI - siulittasoq juunip 16-iat tikillugu		6.585,70	6.585,70
TAI – siulittaasoq juunip 16-ianiit	12.771,22	7.784,60	20.555,82
IAT – siulittaasoq	12.771,22	14.330,37	27.101,59
AAA – siulittaasoq	12.771,22	14.330,37	27.101,59
ISA – siulittaasoq	12.771,22	14.330,37	27.101,59
IKSA – siulittaasoq	12.771,22	14.330,37	27.101,59
Katillugit alt	63.856,10	71.691,78	<b>135.547,88</b>

Eqitsit 1 naapertorlugu, aaqqiissutissat katillugit 135.547,88 koruuninik naleqassaaq. Akissarsianik aaqqiissuteqarnissamut konto 11 naammattunik aningaasartaqanngimmat, aqqiissutissanut akissaqarniarluni konto 1-miit killiliussat iluini nuutsinissaq pisariaqarpoq.

Qullersaqarfiup oqaaseqaataa

Immikkut oqaaseqaatitassaqaanngilaq.

Allaffeqarfiup naliliinera

Allaffeqarfik naliliivoq, ataatsimiititaliat siulittaasuisa akissarsiaat aaqqiivigisariaqartut, kingumoortumillu januaarip 1-aniit 2011-miit aaqqiiviusariaqarlutik. Kontunit assigiinngitsuniit ukiup naaneranut nuussinernut atatillugu allaffeqarfiup aningaasaqarnermut ataatsimiititaliamut innersuusutigissavaa, konto 1-p iluani nuutsinissanut aningaasaqarnermut ataatsimiititaliaq sinnerlugu akuersissuteqarnissaanut borgmesteri pisinnaatinneqassasoq.



Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

**Innersuussut**

Kommunalbestyrelsimut innersuussutigineqassaaq

- 1) ataatsimiititaliat siulittaasuisa akissarsiaat januaarip 1-ani 2011-miit aaqqiivigineqassasut.
- 2) Konto 1-p iluani nuutsinissamut borgmesteri akuersissuteqarsinnaatinneqassasoq

**Aalajangiineq**

**Ilanngussaq**

Ilanngussaqanngilaq



**Imm. 05 Maniitsumi utoqqarnut inissiassat – immikkut aningaasaliissutit**

*Journalnr. 06.02.01/17.05.02/ældreboliger Maniitsoq*

Tunuliaqutaq

Qeqqata Kommunia juulimi 2011-mi utoqqarnut inissialiornissamik isumaqatigiissuteqarpoq. Permagineerip nunatalerineq, betonngilerineq, sanasut suliassaat, inaarsaanerit qalipaanerlu suliaris-savai. Brøndumikkut ruujorilerineq kiisalu Arssarnerit innaallagissanut attavissat.

Suliami matumani aningaasartuutissatut piereersimaffiunngitsut 2,8 procentinik missingersuutitigut nalilerneqarlutik. Imatullu massakkut isikkoqarluni, aningaasartuutissatut piereersimaffiunngitsut 7,5 procentinik naleqalertussaassat.

Ataatsimut katillugit 845.000,- koruuninik immikkut aningaasaliisoqarnissaa pisariaqassalluni, taakkulu massakkut qinnuteqaataapput.

Maleruagassatigut tunngavissaq

Immikkut aningaasaliissuteqarnissat Kommunalbestyrelsen susassaqaarfigivai.

Utoqqarnut iniissialiat Naallakkersuisuniit 8.963.000 koruuninik tapiiffineqarput.

Pissutsit atuuttut

Utoqqarnut inissialiornermi aningaasaliissutitigut aningaasartuutitigullu kisitsisit pingaarnerit

Taaguut	Oqaaseqaatit	Aningaasartuutit.	Aningaasaliissutit
Aningaasaliissutit			20.720.000 kr.
Isumaqatigiissut	Isumaqatigiissut	20.163.259 kr.	.
aningaasartuutit	Sanaartornermi inn. atugaq, sanaartor- nermi kiassarneq il.il.	130.000 kr.	
Pilersaaruserneq	Immikkut	20.000 kr.	
Nunataq, betonngi, sanasut qalipaasut	Imm. betonngi 651.715 kr. Kusserngit naqqartitsiviillu akikill. 199.690 kr.	665.008 kr.	
Innaallagissat	Allangorneri, igaffimmi nerr. qaava kissarsuullu	246.100 kr.	
Ruujorilerineq	Kuuffissuarnut pumpegarfik allang.	339.283 kr.	
	Immikkut aningaas. Qinnuteqaatit		845.000 kr.
Katillugit		21.563.650 kr.	21.565.000 kr.

Suliami matumani immikkut aningaasartuutitut tulluuttut peqqutaapput:

Aputaajaaneq naleqarluni 131.592 koruunit, Permagineerip juulip 3-ani 2012-imi naatsorsuusiartik tunniuppa, isumaqatigiissullu naapertorlugu 229.931,50 koruunit akiligassaagaluarlutik. Rekvisi-tionit naapertorlugit taamaallaat aputaajaasoqartartussaagaluarat, taamalu ingerlaavartumik naatsorsuusiortarlugit, Permagineerip siunnersuutigivaa ilanngaattissat ilanngaatigeereerlugit taamaallat akilissoqassasoq.

Toqqaviliornermi betonngimut immikkut atugaq 651.715 koruuninik naleqarpoq. Atukkamik naatsorsuusiortarnerit ingerlaavartumik tunniunneqartartussaagaluarput, taamaattorli ataatsimoortil-lugu katinnerat aatsaat septembarip 30-ini 2012-imi tunniunneqarluni. Taamatutaaq matumani Permagineerip siunnersuutigivaa, ilanngaattissat ilanngaatigeereerlugit taamaallat akilissoqassasoq. Permagineerimik isumaqatigiissuteqarnermi naqqartitsiviit, ingerlavissiat kussengerlu 199.690 koruuninik ajornaalisattit akikillisaaffineqarput.





TAI Permagreenimiit betonngip annertussusia pillugu uppernarsaammik naammaginartumik tigusaqarnikuunnigilaq, taamaattumillu uppernarsaatissat tiguneqariarpata aatsaat akilerneqarumaarluni.

Pilersaarummi eqqarsaatigineqanngitsoorsimavoq, kuuffissuarmut pumpeqarfiliinissaq pisariaqassa-soq. Tamannalu immikkut 200.000 koruunit missaannik naleqassalluni.

Neqeroorutit allattorsimaffianni kissarsuummik pisinissaq ilaavoq, pilersaarummilu qaavata keramikkiunissaa tiggaliorfittaqaarnissaalu ilaallutik. Tamannalu immikkut 200.000 koruuninik naleqassalluni.

#### Atuilluartuunissap kingunerisinnaasai

##### Aningaasaqarnikkut allaffissornikkullu kingunerisinnaasai

Konto 720020-mi Maniitsumi asfaterinissami 340.000,- koruunit atunngitsuugaapput. Aningaasat nukissiorfiup nutaap eqqaata asfaltherneranut Nukissiorfiit akiliutaaneerput.

Konto 764020-mi Maniitsumi saviminikunik eqqaaviup torersarnerani 105.000,- koruunit atunngitsuugaapput. Aningaasat saviminikunik annertuunerusumik peersinissamut amigarput.

Taakku sinneruttut marluusut utoqqarnut inissialiormi aningaasartuutaanerusunik matussusiisinaapput. Taamaalilluni ataatsimut katillugit 400.000,- koruuninik immikkut aningaasaliissuteqarnissaq pisariaqarluni.

##### Qullersaqarfiup oqaaseqaataa

Immikkut oqaaseqaatitassaqaanngilaq.

##### Allaffeqarfiup naliliinera

Aputaajaanissamik immikkullu betongimik atuinissamik qinnuteqaatit siusinnerusukkulli saqqummiunneqarsimasariaqaralarput. Taamaammatt Permagreenip ilanngaattissat ilanngaatigereerlugit akiliuteqarnissamik neqeroorutaa illuatungeriinnut iluarisimaarnarsorinarpoq.

##### Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini akuersissutigivaa

Nuussinissaq kontoni ukunani

- 720020 Maniitsumi asfaltherineq -340.000,-
- 764020 Maniitsumi saviminikunik eqqaavimmi piianeq -105.000,-

Aamma akuersissutigineqarpoq immikkut. 400.000,- koruuninik aningaasaliinissaq.

#### **Innersuussut**

Kommunalbestyrelsimut innersuussutigineqassaaq

immikkut. 400.000,- koruuninik aningaasaliinissaq akuersissutigineqassasoq.

#### **Aalajangiineq**

##### **Ilanngussat**

1. Permagreen, Utoqqarnut inissialiormi aningaasartuutitigut takussutissiaq
2. Permagreen, utoqqarnut inissialiormi meeqqeriviliormilulu aputaajaanermi takuussutissiaq

**Imm. 06 Qeqqata Kommunia pillugu kukkunersiuisut nalunaarutaat normu 9 aamma 10**

*Journalnr. 06.04.01*

Tunuliaqutaq

Kommunit kukkunersiuisuisa aggustip 23-ni 2012-imi allakkatigut tulliuttut pillugit nalunaarutit normu 9 aamma 10 nassiuppaat:

9. Namminersorlutik Oqartussat susassa qarfiinut tunngasut kommunip 2011-mut naatsorsuutaaniittut – Ukiumut naatsorsuuserivimmut 2011-mut nalunaarutit ilaat.

10. 2012-imut naatsorsuutit kukkunersiorneri – ukiumut naatsorsuuseriffiusumut 2011-mut inaarutaasumik nalunaarusiaq.

Maleruagassatigut tunngavissaq

Aqutsinermi intasisip § 48, imm. 5-ia naapertorlugu kommunalbestyrelsi kukkunersiuisut oqaaseqaataannut akissuteqartussaataavoq, tamatumalu kingorna aalajangiisoqarniariarpat Nakkutillisoqarfimmut akissuteqaatini ingerlatillugit.

Pissutsit atuuttut

**Kukkunersiuisut oqaaseqaataat allaffeqarfiullu kukkunersiuisut nalunaarutaat normu 9 pillugu akissutissatut siunnersuutai.**

Kukkunersiuisut Namminersorlutik Oqartussat susassa qarfiinik tunngasut kommunip 2011-mut naatsorsuutaaniittunik kukkunersiuinerminni nalunaarusiaminni normu 9-mut oqaaseqaateqarfiginissaa pisariaqarsimangitsoq nalunaarutigivaat.

Kukkunersiuisulli maluginiaqqaat, kukkunersiuisut ukiup ingerlanerani tikeraarnermik ilaani kukkunersiuinikkut suliffissarsiuussisarfimmi isumaginninnermullu tunngasutigut pisortaat nakkutilliinerat pillugu oqaaseqaateqartarsimallutik. Oqaaseqaatit tamakku kukkunersiuisut nalunaarutaata normu 8-p akissuteqarfiginerani akissuteqarfiupput.

Ilaqutariinnermut ataatsimiititaliap taamatullu inuutissarsiornermut suliffissaqartitsiniarnermullu ataatsimiititaliap paasissutissiissutigivaat, pisortaat nakkutilliinerat pillugu suli malinnaaffigigamikku, kukkunersiuisut nalunaarutaannut normu 8-mut atatillugu paasissutissiissutaasutuulli.

**Kukkunersiuisut oqaaseqaataat allaffeqarfiullu kukkunersiuisut nalunaarutaat normu 10 pillugu akissutissatut siunnersuutai.**

Kukkunersiuisut 2012-imut naatsorsuutit kukkunersiorneri – ukiumut naatsorsuuseriffiusumut 2011-mut inaarutaasumik nalunaarusiaq pillugu tulliuttutigut oqaaseqaateqarnissartik pisariaqar-tippaat, matuma kinguliani naalisarlugit oqaatigineqartussat:

Missingersuutitigut akuersissutaasutigullu nakkutillineq pillugu assigiinngitsutigut sippuisoqarsimanera Kukkunersuisut maluginiarpaat, tamatumani immikkut aningaasaliissuteqartoqarnisaanik qinnuteqartoqartarsimanani. Sippuinerit annerusut tulliuuttuni pisimapput:

- konto pingaarneq 41-07-mi Maniitsumi meeqqerivit namminersortunut pigisat 1.604 t. koruuninik sippuiffiusimapput
- konto pingaarneq 47-09-mi utoqqaat illuat 1.445 t. koruuninik sippuiffiusimavoq, imatut avitaasunik Sisimiuni 652 t. koruunit Maniitsumili 966 t. koruunit.
- konto pingaarneq 50-05-mi akuleriissitsilluni meeqqeriviit 1.041 t. koruuninik siippuiffiusimapput. Sippuinerit annerusut akissarsianut missingersuutitigut pisimallutik – tassa 2 mio. koruuninik sippuiffiusimasut.
- konto pingaarneq 51-01-mi kommunip atuarfeqarfiini, akissarsiassatut missingersuutit 1,6 mio. koruuninik sippuiffiusimallutik.

Kukkunersuisut maluginiaqqussavaat, Namminersorlutik Oqartussat inatsisaanni allassimammat, suliniutit aningaasartuuteqarnissamik isertitaqarnissamilluunniit kinguneqartussat kommunalbestyrelsimit pisariaqartumik akuerineqartinnagit aallartinneqartassanngimmata.

Allaffeqarfiup siunnersuutigissavaa, oqaaseqaat tulliuuttut akissuteqarfigineqassasoq: Allaffeqarfiup ajuusaarutigalugu nassuerutigissavaa, Kukkunersuisut oqaaseqaataat 2009-mut 2010-mullu inaarutaasumik nalunaarusiornermiit pisimasunik nangitaalluni oqaaseqaataammat. Allaffeqarfiup oqaaseqaat isumaqatigivaa.

Tamaammat pisariaqartutut isumaqarnarpoq, ataatsimiititaliat kommunalbestyrelsip aalajangiinertuulli aningaasaqarnikkut sukangasumik aqutsinissaq pingaartillugu isiginiassagaat. Ataatsimiititaliat malitassatut aalajangersakkat massakkut iliuuserisartakkaniit annertunerujussuarmik malinnaaffigisariaqarpaat, pisariaqartutigullu missingersuutitigut nuutsinissaq qinnuteqaatigisarlugu.

Taamaammat allaffeqarfiup innersuussutigissavaa, kommunalbestyrelsip immikkoortortaqarfiit ataatsimiititaliallu tamaasa piumasaqarfigissagai, siunissami minnerpaamik imaaliortassasut:

1. missingersuutitigut malittarisassat naapertorlugit iliuuseqartassasut, ukiunilu missingersuusiortifiusuni missiliuteqarfiusunilu missingersuutit tutsuiginartut suliarisassagaat (ataatsimiititaliat marluusut missingersuutinik sanioqqusinerpaaffiusut aamma 2013-mut ukiunullu missiliuteqarfiusunut missingersuutitigut malittarisassat pisariaqartumik malinnaaffiginngilaat)
2. aningaasaqarnermut malittarisassat naapertorlugit missingersuutitigut malinnaassasut, tamatumalu malitsigisaanik kontut pingaarnert (kisitsit 4) aqutugalugit qaammatit pingasukkaartunik nalunaarusiortassallutik, kiisalu pingaarnertut immikkortutigut (kisitsit 2) ataatsimiititaliat allat ataatsimiinissaannut
3. minnerpaamik ukiup affaanoortumik aningaasaqarnikkut nalunaarusiornermut atatillugu nuutsinissat isumagisassagaat, ukiup naalivinnera utaqqinagu.

Ataatsimiititaliat marluusut missingersuutinik sanioqqusinerpaaffiusut tulliuuttutigut akissuteqaatis-saqarput:

Ilaqutariinnermut ataatsimiititaliap suliaq novembarip 21-ani 2012-imi suliarivaa siunnersuutigalugulu, oqaaseqaatit tulliuuttut akissuteqarfigineqassasut:

Konto 41-07 Maniitsumi ulloq unnuarlu angerlarsimaffiit namminersortunit pigineqartut pillugit:  
2011-mut naatsorsuutit Ilaqutariinnermut ataatsimiititaliamit (2012-imi marsip 14-iani imm. 6-imi) eqqartorneqarnerini, meeqqanut ikiorsiiniutinut konto 41-mut tunngatillugu missingersuutit atuinerlu tullinnguuttut paasissutissiissutigineqartut:

Missingeersuutaaqqaartut	8.530 t.
Tapiissutit	3.090 t.
Missingersuutit iluarsisat	11.520 t.
Naatsorsuutit	11.468 t.
Atuinikinneruneq	- 151 t.

Ilanngullugu paasissutissiissutigineqassaaq, konto 41-mi ilaqutariinnut inissiinerit, Namminersorlutik Oqartussat ulloq unnuarlu angerlarsimaffiit namminersortullu ulloq unnuarlu angerlarsimaffiit akiliutit saniatigut aamma Ilaqutariinnut kiffartuussivimmut akiliutit tassangaanniit isumagineqartarmata.

Ilaqutariinnut kiffartuussivimmut ukiup ingerlanerani sammisassaqtitsiniutissanut tapiissutinik pissarsinerata kingunerisaanik 2011-mi atuinikinneruvugut.

Ulloq unnuarlu angerlarsimaffinnut atuiffiuvallaarneq eqqarsaatigalugu tamanna (Namminersorlutik Oqartussat ulloq unnuarlu angerlarsimaffiutaannut aamma ilaqutariinnut inissiinernut) ilaatigut atuinikinnerusimanermik nalimmassarneqarpoq. Taamaalilluni Namminersorlutik Oqartussat ulloq unnuarlu angerlarsimaffiini inissanik naammattunik pissarsisinnaannginnera taama erserpoq.

Allaffeqarfiup tungaanit missingersuutitigut ataavartumik malinnaatitsinitsinni kontoni pingaarnerni – imaappoq ilaatigut konto 41-mi – missingersuutit atuinerillu misissorneqartarput.

Konto 47-09 Sisimiuni Utoqqaat Angerlarsimaffianut tunngatillugu tullinnguuttut paasissutissiissutigineqassapput:

2011-p aasaanerani Utoqqaat Angerlarsimaffiat atuiffiuvallaarsimavoq, taamaattumillu sukangasuumik aningaasanik aqutsisoqalernissaa anguniarlugu suliniutinik aallartitsisoqarluni. Akuleruffigineqanngikkaluarpata, 2 mio. koruunit missaannik atuiffiuvallaarsimassagaluarput.

Taamaakkaluartoq immikkoortut ilaat sukateriffigineqarsinnaasimangillat, ilaatigut missingersuutitigut immikkoortitsiviusimanginnerat peqquataalluni.

Assersuutigalugu missingersuutigineqarsimangikkaluartoq, errorsisitsisarneq Katak ApS-imut kommunip suliassanngortippaa. Taamaattumik konto 47-09-10-12-00 Katak missingersuusiorfigineqarnikuunani 595 t.-inik atuiffiuvallaarfiuvoq.

Ilanngullugu 2010-mi aalajangerneqarpoq, Utoqqaat Angerlarsimaffiat uuliamik kiassagaagunnaarluni innaallagialu atorlugu kiassarneqartalissasoq. Taamatut aalajangiinerup kingunerisaanik konto 47-09-10-21-20 253 t. koruuninik missingersuusiorfigineqarsimasoq 817 t. koruuninik sippuilluni atuiffiuvoq. Ilanngullugu oqaatigineqarsinnaavoq, innaallagissamut 564 t. koruuninik atuiffiuvallaarsimammat.

Taamatut aalajangiinerit 2011-mut missingersuutinut ilanngunneqarsimagaluarpata, 500 t. koruunit missaannik sinneqartuussagaluarpuq.

Maniitsumi Utoqqaat Illuanut tunngatillugu tullinnguuttut paasissutissiissutigineqassapput:  
2011-mut naatsorsuutit Ilaqutariinnermut ataatsimiititaliamit (2012-imi marsip 14-iani imm. 6-imi) eqqartorneqarnerini, utoqqarnik isumaginninnermut konto 47-mut tunngatillugu tullinnguuttut paasissutissiissutigineqarput:

Missingersuutaqqaartut	26.112 t.
Tapiissutit	2.433 t.
Missingersuutit iluarsisat	28.555 t.
Naatsorsuutit	29.168 t.
atuiffiuvalaarneq	613 t.

Matumani nuutsisarnerit pingaarnerit (nalinginnaasumik pensionit), angerlarsimaffimmi ikiorteqartitsineq, peqqissaavimmi uninngasitsineq kiisalu Maniitsumi Utoqqaat Illuanik ingerlatsineq aamma Kangaamiuni Utoqqaat Angerlarsimaffimmi nuutsinerit pineqarput. Taamaattumik taakkunani kisitsisit misissugassaqqipput.

Nalinginnaasumik pensionit eqqarsaatigalugit ilanngaattissat ilanngaatigereerlugit 3.065-it missingersuusiarineqarput, naatsorsuutinilu 3.680-iullutik. Imaappoq 615 (tusind-init) atuiffiuvalaarsimavoq. Tamatuma kingunerisaanik 2012-imi immikkut aningaasaliisoqartariaqarnissaa naatsorsutigineqassaaq, soorluttaaq missingersuutit siumut isigisumik iluarsiiiffigineqartariaqassasut.

Angerlarsimaffimmut ikiorteqartitsisarnermut katillugit 2.400 (tusind) koruunit missaat missingersuutigineqarsimapput, katillugillu 350 (tusind-it) missaannik atuinikinnerusoqarsimalluni. Soorunalimi pisariaqartitsineq nikerartuaannartarpoq. Kisianni Utoqqaat Angerlarsimaffiinut tunngatillugu atugassarititaasut annertunerat aamma atuinikinnerunermut patsisaaqataasinnaapput – asser-suutigalugu pingaartumik Maniitsumi Utoqqaat Illuani init marluk tamatigoortut eqqarsaatigalugit.

Qularnanngitsumik init marluk tamatigoortut patsisaallutik Utoqqaat Peqqissaavimmiisinnegartarnerinut aningaasartuuteqartoqarnikuunngilaq. Pisuni ataasiakkaani Peqqissaavik isumaqatigineqarsimannngilaq, matumanili akiliisussaatitaannginnerperit erseqqissaatigisimallutigut. Sisimiuni 663 (tusind) koruunit missaat aningaasartuutigineqarsimapput, tamatumanilu init tamatigoortut pigigaanni qanoq sipaaruteqartoqarsinnaagaluarnerisooq takuneqarsinnaalluni.

2011-mi Maniitsumi Utoqqaat Illuanut aamma immikkut aningaasaliissuteqartoqartariaqarsimavoq, missingersuutinullu iluarsisanut sanilliullugu 5 procentit missaannik atuiffiuvalaarsimasooq naatsorsuutit takutippaat. 2011-mi 2012-illu aallartisimalernerani akissarsianut aningaasartuutit ikilisarnerqarnissaat suliniutigineqarnikuuvoq. Utoqqaat Angerlarsimaffianik ingerlatsinermi tunngavissat allanngujutsuutinneqarnissaasa qulakkeerneqarnissaanut aalajangigassatut suut siunnersuutigineqarsinnaassanersut naliliiffigiumallugu, taamatut suliniuteqarnerup kingunerisai missingersuutitigut tunngaviinut 2012-imi naleqqiunneqartariaqarput. Tamatuma saniatigut ingerlatsinermi aningaasartuutit allat, matumani pingaartumik nerisaqartitsineq ilanngullugu misissorluarneqarnerussapput. Misissuigallarnerit takutippaat, sinerissami Utoqqaat Angerlarsimaffiini najugaqartumut ataatsimut nerisaqartitsinermut missingersuutitigut tunngavissaat annertuumik assigiinngissuteqartut.

Naatsorsuutininut tunngatillugu siuliani taaneqartut saniatigut paasissutissiissutigineqassaaq, ilaatigut naatsorsuutitigut misilittakkat kiisalu sinerissami illoqarfinni utoqqaat angerlarsimaffiini nerisaqartitsinermut tunngatillugu paasisat aallaavigalugit missingersuutit naapertuutinninnerat pillugu, (Ilaqutariinnermut ataatsimiititaliap 2012-imi juunip 12-iani ataatsimiinnerani) 2012-imut immikkut aningaasaliissuteqartoqarnissaanik qinnuteqaammut tunngatillugu innaallagissamut, pisiniarnissa-mut kiisalu nerisaqartitsinissamut immikkut aningaasaliissuteqartoqarnissaanik qinnuteqartoqarmat.

Ilaqutariinnermut ataatsimiititaliap 2012-imi aggustip 15-iani ataatsimiinnerani Qeqqata Kommuni-ani illoqarfinni marlunni Utoqqaat Angerlarsimaffiinnut tunngatillugu kisitsisit pingaernerit sanilli-unneqarnerat paasissutissiissutigineqarpoq. Kommunalbestyrelsip missingersuutit pillugit isumasi-oqatigiinnerini kisitsisit pingaernerit aamma saqqummiunneqarput. Paasissutissat taakku aallaavi-ullutik missingersuutit naliliiffigineqarnissaannut aamma tunngavissaqalerpoq.

Ilinniartitaanermut, kulturimut sunngiffimmullu ataatsimiititaliap suliaq novembarip 5-iani 2012-imi suliarisimavaa siunnersuutigalugulu, oqaaseqaatit tulliuttutut akissuteqarfigineqassasut: 2011-mi naammaginartumik nakkutilliisoqarsimannginnera ilumoorpoq. Tamanna tunngavigalugu ilinniartitaanermut, kulturimut sunngiffimmullu ataatsimiititaliap 2012-imi missingersuutitigut malinnaanermi pitsangorsaanerit ingerlappai. Suleriutsit sukateriffigineqarput, aammalu piffissaa-gallartillugu immikkut aningaasaliissuteqartoqarnissaanik qinnuteqartarnissat siunertaralugit. Oqimaaqatigiissitsinerit aqqutigalugit illoqarfinni nunaqarfinnilu suliffeqarfinni tamani malinnaane-rulertoqassaaq.

Sanaartornermut suliaqarnermut atatillugu sanaartukkat ingerlasut naammassineqarsimasullu pillu-git takussutissiorneqarnikuupput. Ass. Kulturikkut Illorsuup sanaartornerani naatsorsuutit Kommu-nalbestyrelsi aggustip 23-ni 2012-imi akuersissutigivai. Sanaartukkat eqqarsaatigalugit Karseqar-nermut naatsorsuuserinermullu malittarisassat naapertorlugit sanaartornermi naatsorsuutit siunis-sami suliarineqartassapput.

Aningaasaqarnikkut kontut pillugit Kukkunersiuisut inaarutaasumik kukkunersiuinerminni malugi-niarsimavaat, suli kontut arlallit arlaatigut iliuuseqarnikkut oqimaaqatigiisinneqartussaagaluit (ingerlatsinermi kontunut nuutsinngitsoornerit, innuttaasunik/suliffeqarfinnik il.il. akiligassat suli naammassineqarsimanngitsut).

Kukkunersiuisut naliliipput, kommunimi suleriaatsit, pisortat nakkutilliinerat pitsaassutsikkullu nakkutilliinerit ukiumi naatsorsuuteqarfiusumi naammaginartumik ingerlanneqarsimanngitsut. Immikkoortortami suli ajornartorsiuteqartoqarmat, suleriaatsit iliuusissallu piaarnerpaamik immik-koortuni atuutsilerneqarnissaat pingaaruteqarpoq.

Allaffeqarfiup siunnersuutigissavaa, oqaaseqaat tulliuttutut akissuteqarfigineqassasoq: Allaffeqarfiup ajuusaarutigalugu nassuerutigissavaa, Kukkunersiuisut oqaaseqaataat 2009-mut 2010-mullu inaarutaasumik nalunaarusiornermiit pisimasunik nangitaalluni oqaaseqaataammat. Allaffeqarfiup oqaaseqaat isumaqatigivaa.

Periutsit, pisortat nakkutilliinerat aningaasallu kontuisigut pitsaassutsikkullu nakkutilliinerit 2011-mi pitsaanagerusinnaagaluarmat allaffeqarfiup isumaqatigivaa. Karseqarnermut naatsorsuuserinermullu malittarisassat pineqartunut atatillugu ilanngussartaat 2011-p upernaavani aningaasaqarnermut ataatsimiititaliamit akuersissutaapput, aningaasaqarnermullu immikkoortortap siunertarigaluarpaa, aningaasaqarnermi kontut, matumani karseqarnermut naatsorsuuserinermullu malittarisassat ilanngussartaasa atorineqarnerisa ataqatigiissaarnissaat ilanngullugu, immikkoortortami kontut allattorsimaffiata pitsannorsaaffiginissaat, ilaatigut nalimmassaanerit pisariaqartut aqputigalugit, taamatullu aningaasaqarnikkut ilitsersuutip aningaasaqarnikkut kontunut tunngasutigut tapiissuserlugu ineriartortinnissaa.

Karseqarnermut naatsorsuuserinermullu malittarisassat akuerineqarmatali ajoraluartumik kommuni aningaasaqarnikkut pisortaqartarluni pisortaaruttarsimavoq. Taamaattumillu aningaasaqarnermut tunngasutigut aningaasaqarnikkut kontut eqqarsaatigalugit annertunerusumik pingaartillugu ataqatigiissarisinnaaneq ingerlanneqarsinnaasimanani. Neriutiginerparporli aningaasaqarnikkut pisortassaq 2013-ip aallartisimalernerani atorfinitsinneqarumaartoq, aningaasaqarnikkullu kontut isumaginerini siuttuujumaarluni.

Suliasarli aamma Nunamut namminerit, Pinngortitamut Avatangiisinullu Naalackersuisoqarfimmiit allaffissornikkut ilitsersuummik malinnaatitsisimanginnera ajornartorsiummut ilapertuutaasimalluni. Allaffissornikkut ilitsersuut kommunilli kattunnissaat sioqqutingaatsiarlugu ilassutaannartigut malinnaatinneqarnikuvoq. Taamaattumik allaffissornikkut ilitsersuummik malinnaasumik pigisaqartoqanngilaq, tamannalu pingaartumik aningaasaqarnermut kontut eqqarsaatigalugit kissaatiginaraluaqaluni, tassa akiliisitsiniartarnerup kommuniniit Akileraartarnermut Aqutsisoqarnermut nuunerata kingorna.

#### Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

#### **Innersuussut**

Aningaasaqarnermi ataatsimiititaliami Kommunalbestyrelsimullu kukkunerisuinerit akissutissatut siunnersuutit saqqummiunneqartut akuereqqullugit innersuussutigineqassaaq.

#### **Aalajangiineq**

##### **Ilanngussat**

1. Kukkunerisuinerit nalunaarut normu 9
2. Kukkunerisuinerit nalunaarut normu 10



**Imm. 07 Maniitsumut kommunip pilersaarusionerani tapiliusseq nr. 7 inaarutaasumik akuersissutigineqarnera**

*Journalnr.*

Tunuliaqutaq

Inuutissarsiuuteqarfimmik nutaamik, ujaqgerivimmik nutaamik aammalu qaartiterutissaasivimmik nutaamut immikkoortitsisimanerit marluusut kingunerisaannik inaarutaasussap pilersinneqarsinnaaneri periarfissinnissaat qulakkeerniarlugu, Maniitsumut Kommunip pilersaarusionerani tapiliusseq nr. 7, piffissami 2012-imi maajip 23-aniit juulip 18-iata tungaanut tamanut tusarniutaanikuuvoq.

Maleruagassatigut tunngavissaq

Pilersaarusionerq nunaminertanillu atuineq pillugit Inatsisartut inatsisaat nr. 17, 17. november 2010-meersoq, kiisalu Qaartiterutissat pillugit Namminersornerullutik Oqartussat nalunaarutaat nr. 16, 16. juli 2007-imeersoq.

Pissutsit atuuttut

Kommunip pilersaarusionerani tapiliusseq immikkoortunik 700-E7, 700-E8 aamma 700-B12-inik imaqarpoq.

Kommunip pilersaarusionerqarnerani inissialionermut siunertalinnik immikkoortitaasup, maannakut ujaqgeriviusup taartissaanut pilersitsinissamut kommunip pilersaarusionerani tapiliusseq suliarineqarpoq. Ilutigittillugu inuutissarsiuuteqarfiusuni piusuni Maniitsumi aluminiumik aatsiterivimmik pilersitsisoqartussat naatsorsuussaasoq pilersinneqarpat suliffeqarfissanut nutaanut inissakitsuararsuvoq, sulilersussanullu inissiassanik sanaartortoqartussaalluni. Qaartiterutissaasivik ullumikkut inuutissarsiuutinut siunertalinnut nunaminertami nutaami inissisimavoq, taamaattumik illoqarfimmiit alimasinnerusumut inissinneqassalluni.

Saqqummiussinerup ingerlanerani Ineqarnermut, Attaveqarnermut, Angallanermullu Naalakkersuisoqarfimmiit oqaaseqaateqartoqarnikuuvoq, pilersaarusionerfiusup 700-7E.1-ip ataani aalajangersakkat allattorsimanerannik allannguutinik assigiinngitsunik kinguneqartumik. Allannguutit pilersaarutit nutaartaani ilanngunneqarput aammalu allaffissorniinnartut nalilerneqarluni, taamaallilluni pilersaarummik saqqummeeqqinnissaq pisariaqartinneqanngilaq.

Taakku saniatigut naalakkersuisoqarfinit tullinnguuttunik oqaaseqaatinik takkuttoqarnikuuvoq, pilersaarutit siunnersuummut oqaaseqaatissaqaratik nalunaaruteqartunik:

- Inuutissarsionermut Suliffeqarnermullu Naalakkersuisoqarfik
- Aatsitassanut Ikummatissanullu Pisortaqarfik
- Nunamut namminermut, Pinngortitamut Avatangiisinullu Naalakkersuisoqarfik.
- Mittarfeqarfiit.

Aningaasaqarnikkut allaffissornikkullu kingunerisinnaasai

Pilersaarut kommunimut aningaasaqarnikkut kinguneqassanngilaq, kommunip pilersaarusionerqarnerani iliuuseqarnissamik pisussaaffiliinngimmat.

Atuilluartuunissap kingunerisinnaasai

Aluminiumik aatsiterivissamik pilersitsinissamik aalajangiisoqarnissaanut Maniitsoq piareersimasinnaaniassammat, inuiaqatigiinnillu aningaasaqarnermik atuilluartunik pilersitsisoqarsinnaaneranut periarfissiisoqassammat, pilersaarut atuilluartuuffiussaag.

Qullersaqarfiup oqaaseqaataa

Annertunerusumik oqaaseqaatissaqanngilaq.





Allaffeqarfiup naliliinera

Allaffeqarfiup pilersaarummik naliliinerivaa, Maniitsumi aluminiumik aatsiterivissamik pilersitsinissaq pillugu aalajangiinissamut piareersaatitut pisariaqartoq nalinginnaasusorlu.

Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

**Innersuussut**

Allaffeqarfiup inassuteqaatigaa, iluarsissutit ilanngunneqareersut ilanngullugit Maniitsumut kommunip pilersaarusionerani tapiliussaq nr. 7 aningaasaqarnermut ataatsimiititaliap kommunalbestyrelsillu akuersissutigissagaat.

**Aalajangiineq**

**Ilanngussaq**

1. Kommunip pilersaarusionerani tapiliussaq nr. 7 iluarsisaq.

**Imm. 08 Innuttaasut Illuata Ilaqutariinnermut pinaveersaartitsinermullu sullissivittut atuutilernissaanut siunnersuut**

*Journalnr. 09.15.01*

Tunuliaqutaq

2009-mi martsimi Sisimiut illoqarfiani kommunip illuutaanik nalunaarut suliarineqarpoq.

2009-mi nalunaarusiaq toqqammavigalugu sanaartukkanik misissuisussanik suleqatigiissitanik pilersitsinissamut Qeqqata Kommuniani pisortaqtigiit 2010-mi oktobarip 14-iani aalajangiipput. Illuutini init atorneqartarnerinut, periarfissanik aammalu illuatungeriit attuumassutilinnit ininik pisariaqartitsinerup, taassumali saniatigut amigaatinik sulisunut paasiniaanissaq siunertaalluni. (Ilanngussaq 1).

2011-mi aggustip 30-ni Borgmester Hermann Berthelsen-i Innuttaasut Illuata atorneqarneranut nalileeqqinnissamut aammalu siunissami illup atorneqartarnissaanut eqqarsaaigineqarnissaa pillugu siulersuisunut allakkamik nassiussaqarpoq. (Ilanngussaq 2).

Ilaqutariinnermut Ilinniartitaanermullu Pisortaq 2011-mi oktobarip pingajuani Innuttaasut Illuata, Ilaqutariinnut kiffartuussiviup Taseralik-ullu aqqissuussaaneriniq misissuisussanik suleqatigiissitanik pilersitsivoq. Illuutit pingasuusut ataatsimut ingerlatsiveqarsinnaanermut periarfissat pillugit ataatsimiittoqarpoq. Ataatsimiinnermi kommunip suliaqarnissamut periarfissaata atuilluarnissaanut nutaamik allaanerusumillu eqqarsartaaseqarluni siunnersuutiniq ujartuisoqarpoq. (Ilanngussaq 3).

2011-mi oktobarip 17-iani Innuttaasut Illuat, Taseralik, PPR Ilaqutaariinnut kiffartuussiviatalu ataatsimut ataatsimiinnermini illuutini pioresuni innuttaasunut neqeroorutaasinnaasunik allattorsimaffimmik suliaqarput. (Ilanngussaq 4).

2012-imi marsip qulingiluaani Innuttaasut Illuata maannakkut atorneqarneraa atorunnaarsinneqarnissaa pillugu Ilinniartitaanermut immikkoortortani pisortaq aammalu Sunngiffimmi Pisortaq Innuttaasut Illuani siulersuisunut allakkamik nassiussipput. (Ilanngussaq 5).

2012-imi marsip 19-iani Innuttaasut Illuani siulersuisut akissuteqarput illup atuuffiunerata allanguivigineqarnissaanik aalajangiinnermut atuisuusut tusarniaaffigineqarsimangitsut. (Ilanngussaq 6).

Innuttaasut Illuani sammisaqartitsinerit Taseralik-mut imaluunniit Ilaqutariinnut kiffartuussivimmut nuunneqarnissaat pillugit Innuttaasut Illuanik atuisut oqaaseqaatissaqarnerinik, isumaannik imaluunniit siunnersuutissaqarnerinik 2012-imi marsimi apriilimilu suleqatigiissitanit paasiniaaffigineqarput. Tusarniaanermut Angerlarsimaffimmi paarsisartut, Najugaq qimannagu perorsaasunngorniat, PPR, Kigutileriffik, Timigissaasoq Pillorissaasorlu akissuteqarput. Iganissamut, sammisaqartitsinissamut, meeqqat nalaasaarfeqarsinnaanerannut aammalu angerlarsimaffimmi paarsisartut ataatsimoorsinnaaneranut periarfissat pillugit, angerlarsimaffimmi paarsisartut illu annaarusunngilaat. SPS-ip Innuttaasut Illuat siunertaminnut tulluurtutut isigaat. (Ilanngussaq 7)

Immikkoortuni allannqortiterinissamut Taseralik isumaqataavoq.

Aalajangiinerup ingerlanneqarnerani ilanngussat siuliani taakkartorneqartut ataatsimoortillugit ilanngussatut ilanngunneqarput.

Maleruagassatigut tunngaviit

Kommunit aqunneqarnerat pillugu Inatsisartut inatsisaat nr. 22, 18. november 2010-meersaq.

Pissutsit atuuttut

2012-imi juunip 13-iani Ilaqutariinnermut Immikkoortorta qarfimmi Ilinniartitaanermut Immikkoortorta qarfimmilu pisortat allanngortiterinissamat suliniuteqartoqarnissaa aalajangiuppaat. (Ilanngussaq 8):

1. Innuttaasut Illuata matuneqassasoq
2. Cafeteriami suliasat Taseralik Kulturikkut illorsuarmit tiguneqassasut
3. Ilaqutariinnut kiffartuussik Qajaasat 2-miit Innuttaasut Illuanut nuussasoq
4. PPR-ip allaffii sisamat Kollegie 2-mut nuunneqassasut
5. Najugaq qimannagu perorsaasunngorniat allaffii marluusut kollegie 2-mut nuussasut
6. Peqatigiiffiit Innuttaasut Illuanik atuisut Taseralik Kulturikkut illorsuarmit nuussasut, suliasarlu aningaasaliissutip 800.000 koruunit iluini ingerlanneqassasut.
7. Timigissaasoq Pilloriassaasorlu Innuttaasut Illuaniiginnassasut
8. Angerlarsimaffinni paarsisartut meeqqerivinnut attaveqarfeqalissasut
9. Kollegie 2-p qulaa fagini siunnersortinut suliniutinullu ilaatigut Ilinniartitaanermik immikkoortorta qarfimmit atugassinneqartassasoq
10. ilaqutariinnut kiffartuussiviup sinnaakkutaata iluani pinngitsoortitsiniarnermut suliat annertusarneqassasut

Aalajangiineq illuatunginut attuumassuteqartunut tamanut juunip juulillu ingerlanerani tusarniaassutigineqarpoq, tusarniaanerlu ataatsimiittarnikkut ingerlanneqarluni. Tusarniaanermi paasineqarpoq, allanngortiterinissaq attuumassuteqartunit tamanit paasinartinneqartoq. Tunngaviumillu aalajangiisoqartinnagu, Innuttaat Illuani siulersuisut kissaatigaat innuttaasunik tusarniaasoqassasoq.

2012-imi oktoberip 9-ni innuttaasunik tusarniaasitsilluni Innuttaasut Illuanni ataatsimiisitsisoqarpoq (Ilanngussaq 3). Takkuttut amerlanerit utoqqaajupput, taakkulu nalunaarutigaaq utoqqaat katerisi-maartarfiannik amigaateqarlutik. Sap.ak. ataasarlutik Innuttaasut illuat katerisimaarfigisarpaat, taamaammatt utoqqaat illuannik pilersitsisoqarnissaa kissaatigaat. Innuttaasut Illuata allanngortin-niarneqarneranut toqqaannartumik akerliusoqanngilaq

Aningaasaqarnermi allaffissornermilu kingunerisinnaasai

Aningaasaqarnermut kingunerisinnaasai ima inissititerneqarput, sunniutai 2011-mi missingersuummi aningaasartuutinut isertitanullu sanilliunneqarlutik. Ingerlatat matuneqartunut aningaasartuutit missingersuummit peerneqartut eqitsimmi miinusitut nalunaarsorneqarlutik, ingerlatalli nutaat plussitut nalunaarsorneqarlutik.

Aallaavittut Innuttaasut Illuat tamat matuneqassaaq, taamaalillunilu Innuttaasut Illuanut aningaasartuutit 1.921.000 koruuniusunik appassallutik.

Cafeteriap ingerlanneqarnera Taseralik-mut nuunneqassaaq, nuunneqarneranullu Taseralik-mut aningaasaliissutit qaffanneqassallutik, aningaasaliissutit igasumut nerisassiassanullu aningaasartuutit matussusiissallutik. Annertunerusumik aningaasartuutit tapiissutaassapput, aallaavittut Innuttaasut Illuat matuneqarnera peqqutaalluni. Taseralik-up cafeteriaanut aningaasaliissut 353.000 koruuniussaaq.

Maannakkut Ilaqutariinnut kiffartuussivimmi illumut aningaasartuutit sipaarfiuvoq, Innuttaasut illuanili illumut aningaasartuuteqarluni. Maannakkut Ilaqutariinnut kiffartuussivimmi illumut attartornermut aki qaffasinnera peqqutaalluni ilanngaattissat ilanngaatigereerlugit sipaaruteqarfiussaaq.

Tassanili apeqqutaavoq, Taseralik peqatigiiffinnut ininik atuisinnaatitsinera, taamatullu suliap ingerlanneqarnera Qeqqata kommunianut annertunerusumik aningaasartuutaassangipput, aningaasaliissutimmi qaavisigut 800.000 koruuninik ilaneqarput.

Ilanngaattissat ilanngaatigereerlugit 993.000 koruunit sipaarutaasut atoriaannarnut kontomut ikineqarsinnaassallutik.

Tabel 1 Aningaasaqarnermut nalunaarsuiffik, Aningaasartuutit annikinnerit, annertunerusumik isertitat (-) Annerusumik aningaasartuutit annikinnerusumillu isertitat (+).1000 kr.

<b>Aalajangiineq</b>	<b>Naatsorsuiffiit</b>	<b>Konto</b>	<b>Kr. ( i 1.000)</b>	<b>2012-imi kingunissat</b>
Innuttaasut Illuata matuneqarnera		53-03-18		-1.921
Cafeteriami suliassat Taseralik-mut nuunneqassapput, sipaarfiusut sulisumik ataatsimik nerisassiormullu aningaasartuutit isertitanillu annikillineqarlutik. Cafeteriap ingerlanneqarneranut tapiissutit 352.000 kr.	Sulisuq	53-03-18-01-10	343	343
	Ilanngaattissat ilanngaatigereerlugit aningaasartuutit			
	Nerisassiorneq	53-03-18-16-02	132	
	Nerisitsineq Nerisanik isertitat	53-03-18-79-13	- 122	10
Ilaqutariinnut kiffartuussiviup innuttaasut Illuanut nuunneqarnera, taamaasilluni Qajaasat 2-mi illumut aningaasartuutit sipaarutaassallutik, Innuttaasut Illuanilu illumut aningaasartuuteqalissalluni.	Eqqiaaneq	41-09-10-15-01	115	
	Atortut	41-09-10-15-01	16	
	Imeq	41-09-10-21-10	2	
	Innaallagiasq	41-09-10-21-20	52	
	Illumik attartornermut akiliut	41-09-10-25-01	254	
Innuttaasut Illuani Ilaqutariinnut kiffartuussiviup illumut aningaasartuutissai.	Eqqiaaneq	41-09-10-15-01	14	
	Atortut	41-09-10-15-01	6	
	Uulia	41-09-10-21-40	38	
	Innaallagiasq	41-09-10-21-20	46	
	Sanaartukka	41-09-10-22-01	10	
		(konto nutaaq pilersinneqassaaq)		
800.000 koruuninik aningaasaliissutit sinaakkutaanik aningaasaliineq.	Taseralik	59-04-10-35-00		800
Innuttaasut illuata Ilaqutariinnut kiffartuussivinngorlugu allannortiterineq	Iluarsaassinerit assigiinngitsut (ataasiaannartumik aningaasaliineq)	41-09-10-22-99		100
<b>Sinneqartoorutit atoriaannarnut kontomut nuunneqarsinnaapput / imaluunniit Innuttaasut illuata Ilaqutariinnut kiffartuussivinngorlugu allannortinneqarneranut sipaarutit.</b>	Aningaasat atoriaannaat	90-01-10-90-01		<b>-993</b>

### Qullersaqarfiup oqaaseqaatai

Qullersaqarfiup innersuussutigaa, Innutaasut Illuanit, Ilaqutariinnut kiffartuussivimmit, Taseralik Kulturikkut illorsuarmit, PPR-imit, SPS-imit Kollegie 2-millu ingerlatsinermit allannguissamut immikkoortortaqarfinni pisortanit suliarineqartut malinneqassasut.

Taamaalilluni immikkoortortani pisortat innersuussutaanut qullersaqarfik isumaqataavoq.

### Allaffeqarfiup naliliinera

Oktoberip ull. 9-ni 2012 tusarniaasitsineq pereermat toqqaannartumillu pilersaarummut akerliusoqarani, allaffeqarfimmit innersuussutigineqarpoq allanngortitsineq piviusunngortinneqassasoq, piffissaliuussisoqassasorlu pilersaarutip piviusunngortinnissaannut.

### Allaffeqarfiup innersuussutaa

Ilinniartitaanermut Kulturimut Sunngiffimmullu ataatsimiititaliamut innersuussutigineqarpoq:

Allannguinerit ingerlanneqassasut pilersaarutit malillugit piffissaliuussinerlu suliarineqassasoq Suliaq aningaasaqarnermit ataatsimiititaliamut kommunalbestyrelsimullu ingerlateqqinneqassasoq

### Ilinniartitaanermut Kulturimut Sunngiffimmullu ataatsimiititaliami suliaq suliarinera

Ilinniartitaanermut Kulturimut Sunngiffimmullu ataatsimiititaliap novembarip 5-ani 2012-imi ataatsimiinnermini suliaq suliarivaa.

Innersuussut akuerineqarpoq.

Imm. Aningaasaqarnermik ataatsimiititaliamut, Kommunalbestyrelsemut Ilaqutariinnermillu ataatsimiititaliamut ingerlateqqinneqassaaq.

### Ilaqutariinnermut ataatsimiititaliami suliaq suliarinera

Ilaqutariinnermut ataatsimiititaliap novembarip 14-ani 2012-imi ataatsimiinnermini suliaq suliarivaa.

Innersuussut akuerineqarpoq.

### Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

### **Innersuussut**

Aningaasaqarnermut ataatsimiititaliamut kommunalbestyrelsimullut akuersissutigeqqulugu innersuussutigineqarpoq

Allannguinerit ingerlanneqassasut pilersaarutit malillugit piffissaliuussinerlu suliarineqassasoq

### **Aalajangiineq**

### **Ilanngussaq**

1. Ilanngussat ataatsimoortitat

Utoqqaat allagaat 13.aug. 2012-imeersoq atsiugaq 9. Okt. 2012-imi tusarniaasitsinermi imaqarniliaq

**Imm. 09 Kommunip ilaqtariinnut arlalinnut inissiaataanik inissiatut nammineq pigisatut tuniniaanissaq**

*Journalnr. 09.08*

Tunuliaqutaq

Qeqqata Kommunua innutaasunit saaffiginnissutinik pingasunik tigusaqarsimavoq, ataatsip inigisaminik nammineq piginnittut tiguisinnaanissaminik ilitsersorneqarnissani ujartoraa, marlullu ullumikkut komunip inissiaq namminerminut attartortitaata nammineq pigisamit tigunissaanik kissaatiginnittut.

Maleruagassatigut tunngavissaq

Namminersornerullutik Oqartussat kommunillu inissiaataanik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq.

Pissutsit atuuttut

Kommunalbestyrelsi februaarimi 2009-mi ataatsimiinnermini aalajangiivoq, Sisimiuni inissiaateqarfimmi blokkimi Umiiivtsiamiittoq attartortittagaq ataaseq namminerisatut inissiaateqarfittut aaqqinneqassasoq. Taamatut pisinnaatitsineq akuerineqarluni inissiaateqarfimmi attartortut ilaata ataatsip misiligutaasumilli taamatut periarfissaqarnissamik saaffiginnissutaa tunngavigalugu. Tamatut aalajangiinerup malitsigisaanik blokkimi attartortunit allaniit saaffiginnittoqanngilaq. Inissiamik attartortoq nammineq piginnilersinnaanissamik saaffiginnissutiginnittoq, taamatut nammineq piginnilersinnaanissamut uppernarsaatissanik annertunerusunik saqqummiussaqaanngilaq.

Allakkatigut inuullu ataatsip nammineerluni saaffiginnissutaat najugaqarfinnut aasigiingitsunut pingasunut Salliaq, Umiiivtsiaq kiisalu Ujaqkerivimmu tunngasuupput.

Inatsisartut peqqussutaata paragraffii 4-ra 5-ilu naapertorlugit, kommunalbestyrelsimut qinnuteqaammut aningaaserivimmiit qinnuteqartup tunisinermi akigititassap sinneranut akissaqassusia pillugu oqaaseqaat pituttuisunngitsoq ilanngunneqartussaavoq. Tamatumalu kingorna qinnuteqaat akuerisaariapat kommunalbestyrelsi inissiat attartortittakkat namminerisatut inissiaatit agguataassallugit, kiisalu qinnuteqartoq piginneqatigiiffiliornissaani tassungalu malittarisassiornissamut ikiorlugu.

A/S Inissiaatileqatigiiffik INI-p Ujaqkerivimmi inissiaateqarfiit attartortittakkat pingasuusut (B-1791, B-1792 aamma B-1793), taamatullu Narsannguami inissiaateqarfiit attartortittakkat pingasuusutaaq (B-1885, B-1886 og B-1887) namminerisatut aaqqinneqarsinnaanerinit misissorsimavai, atortussallu allaganngorlugit saqqummiullugit. Inissiaateqarfinni arfiniliusuni inissiaartaqarput 11-nik 12-nillu – katillugit attartortittakkanik inissiaartaqarlutik 23-inik, inissiaqarfiillu 'attartortuunermiit piginnittuunermut' aaqqissuussineq aqqutigalugu, nuuttoqarnera aqqutigalugu tuniariarlugit neqe-roortugisinnaanissaat periarfissaqarpassilluni. Inissiaateqarfik taaneqartut taakku arfinillit saniatigut inissiaqarfinni aamma tallimanik ilaqarpoq, inissiat quleriaat B-1794, B-1795 aamma B-1797 (inissiat 3 x 6-t) kiisalu sanileriaat B-1796 aamma B-1797 (inissiat 3-t aamma 4-at), taakkulu ullumikkut inissiaatileqatigiiffiup pigisarivai.

INI-p maluginiaquaa, inissiaateqarfimmi atugassarititaasut, soorlu kiassaateqarfeqarfik, Ujaqerivik Narsannguarlu tamakkerlugit kissamik imermillu pilersuisuusooq, anteneqarfimmut sakkortusaavik kiisalu kiassarnermut kuuffissuarnullu qerinaveeqqutaasut pumpeqarfiattu ilanngullugu, allannguuteqanngitsumik atuutinneqaannassapput. Inissiaatileqatigiiffimmik najugalinnullu peqatigiiffimmik pilersitsisoqarneratigut, aqquserngit qulliilu isiginiarneqartussaapput, aammalu aputaajaaneq eqqagassanillu annertuunik suliaqartitsineq taamatullu aamma manisiviit, pinnguartarfiit kiisalu illu ataatsimoorfiusartoq.

Tunineqarsinnaanerinit atattillugu attartortittakkat pineqartut tamakkerlugit avatangiisitigut aningaasaqarnikkullu imermut kiassarnermullu uuttusersuisooqarnissaata qanoq sunniuteqarsinnaanissaa misissussallugu pissusissamisoorsimavoq. Sisimiuni inissiaateqarfik Qeeqi siusinnerusukkat najugaqarfiit tamakkerlugit uuttusersorneqarsimavoq, imerqarnikkullu taamatullu kiassarnermut atuinerup naatsorsornerata naammassineqarnerata takutippaa, najugarfinnut ataasiakkaanut imermut kiassarnermullu uuttusersuinikkut, ataatsimut isigaluni 30 procentit missaannik sipaaruteqarfiussasoq naatsorsuutigineqartoq.

Najugarfimmut tamarmiusumut imeqarnermut kiassarnermullu uuttusersuinermi C-tut missiliut, quleriit ilanngullugit, 380.000 koruuninik naleqartussaavoq. Imermut/kiassarnermut ukiumut aningaasartuutissat 10.000 koruuniussasut naatsorsuutigigaanni, atortorissaarusorneq ukiut pingasut iluanni imminut akilertussaavoq.

#### Aningaasaqarnikkut allaffissornikkullu kingunerisinnaasai

Inissiat attartortittakkat namminerisatut inissianngortinnissaasa allaffissornikkut kingunerisinnaasa pingaarnersarivaat kommunalbestyrelsimut suliamik saqqummiussassanillu suliaqarnerusussaavoq, taamatullu aamma piserusuttunik najugaqartunullu allanut allakkatigut attaveqarneq.

Inissiat 23-t ilaannik piserusussinnaasumut tulluuttut saqqummiunneqartussaapput:

- Inigisap attartukkap nammineq pigisatut tiginissaanik neqeroorut ("attartortuunermiit piginnittuunermut").
- Piginneqatigiiffik pillugu paasissutissiineq malittarisassallu assilineri.
- Tunisinissami inissiamut ataatsimut naatsorsuusiorneq tamakkiisoq.
- Inissiap namminerisassap allaaserineranik paasissutissiineq.
- Inissiap namminerisassap tuniniaaffimmi nalinginnaasumik nalinganik paasissutissiineq.
- Ukiumi ingerlasumi inissiaqarfimmi pineqartumi aningaasartuutissatut missingersuutit.
- Inissiaqarfimmi naatsorsuutit akuerisaasut kingullit, kiisalu
- Inissiamut atattillugu akiitsut piginnittumullu immikkut piumasarisat pillugit paasissutissiissutaasinnaasut.

Aningaasaqarnikkut kingunerisinnaasaatut pingaarnertut taaneqarsinnaasut makuussapput, inissiaqarfiup agguataarneranut aningaasartuutit namminerisatullu tigusineq, matumani naliliinermut, siunnersortimut, inatsisilerituumut piginnittutullu uppersarsaatip naqissuserneranut aningaasartuutit. Tunisinermut akigititamat inatsisitigut 50.000 koruunit tamakkunuuna aningaasartuutit ilanngunneqarsinnaapput. Inissiaatileqatigiiffimmut INI-mut akiliutit inaarutaasumik aalajangersarneqassallutik, periusissat akiliutissallu aalajangersaaffigineqariapata.

Inissiamik nammineq pigisassatut tunisinermi aningaasaliissutitigut iluanaarutaasartoq 1,5 procentiusooq annaaneqassaaq. Tamatumalu qanoq annertutigissusissaa inissiat qassit tunineqarnerinit aallaaveqartussaalluni. Inissiamut ataatsimut ukiumoortumik aningaasaliissutitigut 17.712 aamma 18.144 koruunit iluanaarutaasarpit.

Tamakku saniatigut inissianut tunisanut aserfallatsaaliinissamik pisussaaffik atuukkunnaassaaq.



### Allaffissornikkut naliliineq

Massakkut inissiamik Ujaqquqerivimmi attartukkamik tiguisinnaanissaq pillugu apeqquaqtaasoq aallaavigalugu allaffeqarfik naliliivoq, Sisimiuni Ujaqquqerivimmi Narsannguamilu inissiaqarfiit sinneruttut arfiniliusut, namminerisamik ineqarsinnaaneq siuarsarniarlugu pilersaarusiornissami isiginiartariaqaraluartut. Tunisineq 'Attartortuunermiit piginnittuunermut' aqqissuussineq, kiisalu nuunermut atatillugu akisunerpaamik akiliuteqarusuttumut tunisisinnaaneq aqqutigalugit ingerlanneqarsinnaavoq.

Taamatullu allaffeqarfik aamma naliliilluni, aningaasaqarnermut avatangiisillu ataatsimut eqqarsaatigalugit, inissiaqarfinni Ujaqquqerivimmi Narsannguamilu imermut kiassarnermullu uuttusersuinisamik periarfissanik ujartuinissaq pisariaqavissorinarloq. Toqqammavissalimmimmi 30 procentit tungaanortumik sipaaruteqarsinnaanissaq piviusunngortinnianngikkaanni akisussaassuseqanngitsuliornerussaaq.

### Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

### **Innersuussut**

Aningaasaqarnermut ataatsimiititaliamut kommunalbestyrelsimullu akuereqqullugu innersuussutigineqassapput,

- Ujaqquqerivimmi inissiaateqarfiit attartortittakkat pingasuusut B-1791, B-1792 aamma B-1793 (attartukkat 11-t), taamatullu Narsannguami inissiaateqarfiit attartortittakkat pingasuusuttaaq B-1885, B-1886 aamma B-1887 (attartukkat 12-t) namminerisatut aqqinneqarsinnaaneritut misissuineq ingerlatiinnarneqassasoq, inissiaqarfiillu 'attartortuunermiit piginnittuunermut' aqqissuussineq aqqutigalugu, nuuttoqarnera aqqutigalugu akisunerpaamik neqerooruteqartumut tuniniarlugit.
- Allanilu najugaqarfinniit 'Attartortuunermiit piginnittuunermut' aqqissuussineq aqqutigalugu saaffiginnissutaasut unitsinneqarallassasut, taamatut aqqissuusiniarnerup matuma misilittagarfigilernissaata tungaanut, kiisalu
- najugaqarfinni Ujaqquqerivimmi / Narsannguami imermut kiassarnermullu tamakkiisumik uuttusersuisoqarnissaanik periarfissanik misissuinerit ingerlatiinnarneqassasut.

### **Aalajangiineq**

#### **Ilanngussat**

1. Ujaqquqerivimmi Narsannguamilu attartortikkat allattorsimaffiat
2. Kussangasoq aqqusineeralu pillugit takussutissiaq



**Imm. 10 Aningaasaqarnermut ataatsimiititaliap kommunalbestyrelsillu 2013-imi ataatsimiiffissaannut siunnersuut**

*Journalnr. 01.01.01*

Aningaasaqarnermut ataatsimiititaliap kommunalbestyrelsillu 2013-imi aprili ilanngullugu ataatsimiiffissaannut siunnersuut.

Ukiup sinneranut ataatsimiiffissanut siunnersut saqqummiunneqassaaq kommunalbestyrelsimut qinersereernerup kingorna inissitsiterluni ataatsimiinnermi.

Allamik nalunaartoqarsimatinnagu ataatsimiinnerit tamarmik nal 8:30 aallartittassapput oqarasuaatikku/videokonferenciluunniit atorlugu ingerlanneqartassallutik.

<b>Aningaasaqarnermut ataatsimiititaliap</b>	<b>Kommunalbestyrelsi</b>
12. februar	28. februar
12. marts	
9. april	25. april – 2012-mut naatsorsuutit akuerineri.

Aningaasaqarnermi ataatsimiititaliap suliamik sularinninnera

Aningaasaqarnermi ataatsimiititaliap novembarip 27-ani 2012 ataatsimiinnermini allaffeqarfiup innersuussutaa akuersissutigivaa.

**Innersuussut**

Ataatsimiiffisat siuliani taaneqartut, aningaasaqarnermut ataatsimiititaliamit kommunalbestyrelsimillu akuerineqassasut, Qullersaqarfiup innersuussutigaa.

**Aalajangiineq**

**Ilanngussaq**

1. 2013-imut ullorsiutit - ukiup affaanut siullermut



## **Imm. 11 Qeqqata kommuniani meeqqat atuarfiisa aqunneqarnerini ileqqoreqqusamut siunnersuut**

*Journalnr. 51.00*

### Tunuliaqutaq

Meeqqat atuarfii ineriartortinneqarnissaat pillugit Qeqqata Kommuniani kommunalbestyrelsi 2011-mi marsip 11-ani 12-iani kommunimi meeqqat atuarfii pillugit isumasioqatigiisitsinermili suliamik ingerlataqarpoq. Atuarfinnik pitsanngorsaanaissaq aallaavigalugu Qeqqata Kommuniani meeqqat atuarfiisa aqunneqarnerini ileqqoreqqusamut siunnersuut saqqummiunneqarpoq.

Kommunitsinni meeqqat atuarfiisa sinaakktissaat aqunneqarnerinut ileqqoreqqusami allaaserineqarput.

### Maleruagassatigut tunngavissat

Atuarfik pillugu Inatsisartut peqqussutaat nr. 8, 21. maj 2002-meersoq.

Kapitali 9 § 38-mi allaqqavoq: ”... Kommunalbestyrelsip atuarfiit sulineranni anguniagassat sinaakktissallu aalajangersassavai. Kommunalbestyrelse atuarfiit sulinerannik nakkutilliisuvoq.”

Meeqqat atuarfiisa aqunneqarnerinut ileqqoreqqusat inatsisit malillugit pisussaaffiupput.

Kapitali 9 § 39 ima allassimavoq:

” Atuarfinni siulersuisut oqaaseqaateqartereernerisigut kommunalbestyrelse kommunimi atuarfeqarfiup aqunneqarnera pillugu ileqqoreqqusaliussaaq. Ileqqoreqqusap makku pillugit aalajangersakkat ilaatigut imarissavai:

- 1) Angajoqqaat ilaasortaaitaasa atuarfiup siulersuisuini amerlassusissaat.
- 2) Atuarfiup siulersuisuini taaseqataasinnaanani ataatsimeeqataasartussamik pisariaqartitsineq naapertorlugu toqqaaneq, tak. § 40, imm. 4.
- 3) Atuarfiup siulersuisuini ilinniartitsisut atuartullu ilaasortaaitassaannik qinersinermi periusissat.
- 4) Kommunalbestyrelsip § 40, imm. 10 malillugu angajoqqaat ilaasortaaitaannik qinersisarneq kipungasumik pisassasoq aalajangersimaneraa.
- 5) Kommunip atuarfeqarfiani ataatsimoorluni siunnersuisartoqatigiiusinnaasut katitigaanerat.

*Imm. 2.* Ileqqoreqqusap imarissavaattaq pisinnaatitaaffiit § 38, imm. 4 naapertorlugu atuarfiup siulersuisuinut isumagisassanngortitaasimasinnaasut allaaserinerat.

*Imm. 3.* Ileqqoreqqusamut ilanngussami allanneqassapput kommunalbestyrelsip atuarfiup ilusiligaanera il.il. pillugit aalajangiineri, tak. § 38, imm. 2, nr. 3-miit 6-imut.

*Imm. 4.* Naalackersuisut ilitsersuutaasumik nalinginnaasumik ileqqoreqqusaliussapput.”

### Pissutsit atuuttut

Atuarfeqarfinnut akisussaaneq pillugu aqunneqarnerani ileqqoreqqusami ersarissarneqarpoq. Ilaatigut atuarfinnut aningaasaliinissamut, atuarfiit pisortaanik atorfinitsitsineq soraarsitsinerillu, atuarfiup ilusilersugaanera, klassinik pilersitsineq, tiiminik amerlassusiliineq, immikkut atuartsineq Kommunalbestyrelsip akisussaaffii. Atuarfinni pisortat akisussaaffii, atuartsinerup pitsaassusaanik nakkutilliineq qulakkeerinerlu, piumasarineqartut naapertorlugit paasissutissanik misissueqqissaakkanillu pissarsiarinissaanik akisussaaffik. Atuarfiit aqunnerinut atatillugu atuarfimi siulersuisut akisussaaffii ilanngullugit allaaserineqarput, ilaatigut katitigaanera aaqjissuussaaneralu.

2009-mi kommunit kattunnerisa Maniitsumi Sisimiunilu atuariit aqunnerini ileqqoreqqusanik nutaanngitsunik ataqtigiissaarinissamik naleqqusaaanissamillu periarfissiivoq. 2012-imi juunip 11-ni ilinniartitaanermut, Kulturimut Sunngiffimmilu ataatsimiititaliap immikkut ataatsimiinnermini meeqqat atuarii aqunneqarnerinik ileqqoreqqusanut siunnersuut nutaaq, kommunimut tamanut atuuttussaq ” Qeqqata kommuniani meeqqat atuariisa aqunneqarnerini ileqqoreqqusaaq ” saqqummiunneqarpoq. Atuariit aqunneqarnerini ileqqoreqqusaaq akuersissutigineqarpoq, atuariillu siulersuisuinut tusarniaassutigineqarnissaa aalajangiunneqarluni, 2012-imi aggustip 20-ni akissuteqarnissamut piffissalerlugu, piffissaliussaq septembarip 15-ianut sivitsorneqartoq. Qeqqata Kommunia Minngortuunnguup Atuarfianit, Nalunnguarfiup Atuarfianit, Atuarfik Kilaseeraq-mit, Atammik Atuarfianit, kiisalu Kangaamiut Atuarfianit akissuteqaatinik tigusaqartoqarpoq. Tusarniaanermut akissutit meeqqat atuariinik ineriartortitsinissamut suliniummut aqutsisoqatigiinnit, Qeqqata Kommuniani qullersaqarfimmit inuttaqartumit suliarineqarput, politikikkullu suliarineqarnissaanut saqqummiunneqassallutik. Aaqqiissutissat annikittualuit atuariit aqunneqarneranut ileqqoreqqusanut ikkussorneqareerput, aaqqiissutit aappaluttumik naqinnernillu silittunik nalunaaqutseqqapput. Aaqqiissutit ilanngussallu aqutsisoqatigiinnit misissorneqarput, taakkulu uani kinguliani saqqummiunneqarlutik. Aaqqiissutit ilassutillu ataasiakkaat kinguliani aqutsisoqatigiit innersuussutaat allassimassaaq.

**Atuariit tusarniaanermut akissutaat:**

Kapitel 1 § 1: *imm. 6-imi tullinnguuttutigut oqaasertalimmik ilanngussisoqarnissaa siunnersuutigineqarpoq:*

*”Kommunalbestyrelsi ilaasortaminik atuariup siulersuisuisa ataatsimiinnerini taaseqataasinnaatitaanani peqataasussamik toqqaassaaq.”*

Aqutsisoqatigiit naliliinera: ilanngussaaq kommunalbestyrelsimit akuersissutigineqassanngitsoq, tassami kommunalbestyrelsi peqataassasoq-mik piumasaqaateqarmat, maannakkulli peqataasinnaasumik allaqqalluni, taamaattumik siunnersuut taanna kommunalbestyrelsimit akuersissutigineqarnissaa ajussalluni. Aqutsisoqatigiit atuariit aqunneqarnerini ileqqoreqqusami Kapitali 3 § 5 imm. 3 “Atuariup siulersuisuisa tamanna pillugu qinnuteqareernerisigut kommunalbestyrelsi aalajangiussinnaavaa, inuk kommunalbestyrelsimit toqqarneqartoq atuariup siulersuisuisa ataatsimiinnerini taaseqataasinnaatitaanani peqataasassasoq.” innersuussutigissavaa, tamannalu Atuarfik pillugu Inatsisartut peqqussutaat nr. 8, 21 maj 2002-meersumi, kapital9 § 40 imm. 4-mi ima allassimasumut: ”Atuariup siulersuisuisa tamanna pillugu qinnuteqareernerisigut kommunalbestyrelsi aalajangiussinnaavaa, inuk kommunalbestyrelsimit toqqarneqartoq atuariup siulersuisuisa ataatsimiinnerini taaseqataasinnaatitaanani peqataasassasoq.” naapertuulluni.

Kapitali 2-mut: *Atuariit aqunneqarnerini ileqqoreqqusaaq ukiumut nalunaarusiamik kingusinnerusukkut tunniussisarnissamut siunnersuut, ilinniartitsisut sulinnigiffeqarneranni atuariup atsiortitsinissamik pissarsiniarnissamik ajornakusoortarmat.*

Aqutsisoqatigiit naliliinerat: piffissaliussamik allannguisoqassanngitsoq.

Kapitali 3 § 17-imut: *ukiumut marloriarluni angajoqqaanik ataatsimoorussamik atuariup siulersuisui ataatsimiigiaqqusisarnissaanut siunnersuut, ukiakkut atuariup ingerlatsineranik ataatsimiinneq upernaakkullu ukiumut nalunaarusiaq pillugu ataatsimiinneq.*

Aqutsisoqatigiit naliliinerat: siunnersuut akuersissutigineqassanngitsoq, ukiumut marloriarluni ataatsimiisitsisarnerup atuariimmi siulersuisuinut ilaasortanut, atuariimmi pisortamut ilinniartitsisunullu sinniisunut tiiminut aningaasartuutinik annertusaanermik kinguneqassammat.

§ 16-imut: *aqutsisoqatigiit imm. 2-mik tullinnguuttutigut oqaasertalimmik ilanngussisoqarnissaa siunnersuutigaa ” Atuariup siulersuisuinut nutaanik qinersisoqareernerimi, atuariup siulersuisut suliaqarnissamut sakkussaqartinniarlugit pikkorissarnissamik ilaasortat neqeroorfigineqassapput.”*

*Ilanngussaqaarenermi imm. tullinnguuttut normui allanngortinneqarput (atuarfiit aqunneqarnerinut ileqqoreqqusami ilanngunneqaareerpoq aappaluttumik naqinnernillu silittunik nalunaaqqutseqqallutik).*

Aqutsisoqatigiit naliliinerat: ilanngussaq akuersissutigineqassasoq

Kapitel 4-mut: kapitali 4-p peerneqarnissaanut siunnersuut:

**”Pisinnaatitaaffiit isumagisassanngortinneqartut**

(Peqqussummi § 38, imm. 4.)

**§ 18.**

*Kommunalbestyrelsip aalajangiuppa, kommunalbestyrelsip pisinnaatitaaffiisa arlaannaalluunniit atuarfinni siulersuisunut isumagisassanngortinneqassanngitsut.*

*Imm. 2.*

*Isumagisassanngortinneqarnernut aalajangiutaasinnaasut ileqqoreqqusamut ilanngussanngorneqassapput.*

*Kapitalip taassuma § 1 imm. 4 akerlilerneranik tunngavilerneqarluni:*

*”Kommunalbestyrelsip peqqussut una naapertorlugu pisinnaatitaaffini tamaasa ilaannaaluunniit atuarfinni siulersuisunut isumagisassanngortissinnaavai, taamaallaat pisinnaatitaaffiit nakkutilliisutut, aningaasaliisartutut sulisisutullu oqartussaaffeqarnermik tunngaveqartut pinnagit.”*

Aqutsisoqatigiit naliliinerat: siunnersuut akuersissutigineqassanngitsaq.

Kapitel 5 § 20 imm. 2-mut: *atuanngitsoortarnerit ilanngunneqassasoq, tassanilu atuartut annertuumik atuanngitsoortartut kisimik atuarfiup siulersuisuinut nalunaarutigineqartassasut.*

Aqutsisoqatigiit naliliinerat: siunnersuut akuersissutigineqassanngitsaq.

*Suleqatigiinnermik ataatsimiititaliaq aammalu sillimaniarnermut sinniisut suliaanik kapilatimik nutaamik ilanngussisoqarnissamut siunnersuut. Aqutsisoqatigiit naliliinerat: siunnersuut akuersissutigineqassanngitsaq, atuarfiit aqunneqarneranut ileqqoreqqusanut ilaasussaangimmat, suliffeqarfiit avatangiisiinut inatsimmut ilaammat.*

Aningaasaqarnikkut allaffissornikkullu kingunerisinnaasai

Atuarfinni kommunimillu allaffissornikkut ileqqoreqqusat sakkussatut atorneqartussat manna pigineqalerput.

Ileqqoreqqusat siunnersuut ilaatigut Qeqqata kommuniani atuarfinni pingaartitatut tunngavii, kommunalbestyrelsip akisussaaffii, atuarfinni siulersuisut akisussaaffii, atuarfinni pisortat akisussaaffii, perorsaanermi siunnersuisoqatigiit, atuartut siunnersuisoqatigiivi kiisalu atuarfinni attaveqarnermut siunnersuisoqatigiit allaaserineqarput.

Taakku saniatigut atuarfeqarfiit ilusilersorneqarneri, aningaasaqarnikkut allaffissornikkullu sinaakkutit ilanngussani ilitersuutinilu allaaserineqarput. Ileqqoreqqusanut ataavartumik ilanngussaqartassaaq. Pisariaqartillugu ilanngussat allanngortinneqarsinnaapput, soorlu atuarfiup ilusilersorneqarnerata, tiiminik agguassineri pilersaarutip allallu allanngortinneqarneranut atatillugu.

Ileqqoreqqusanut ilanngussat piffissami matumani suliarineqarput, naammassippatalu Kommunalbestyrelsimut saqqummiunneqassallutik.

Qullersaqarfimmit oqaaseqaatit

Qullersaqarfimmit innersuussutigineqarpoq, Kommunalbestyrelsip aqutsisoqatigiit innersuussutaat malissagaat.

Allaffeqarfiup naliliinera

Qeqqata kommunip atuarfeqarnermut inatsit malissappagu, taava atuarfiit aqunneqarneri pillugit ileqqoreqqusaq pisariaqartoq allaffeqarfiup nalilerpaa.

Allaffeqarfiup innersuussutaa

Ilinniartitaanermut, kulturimut sunngiffimmullu ataatsimiititaliamut innersuussutigineqarpoq Meeqqat atuarfiisa aqunneqarnerinut ileqqoreqqusanut siunnersuut aaqqiissutit ilanngullugit akuersissutigineqassasoq.

Aqutsisoqatigiit aaqqiissutissanut atatillugu innersuussutaat malinneqassasut

Ilanngussat ataavartumik saqqummiunneqassasut

Aqunneqarnerimik ileqqoreqqusat tusarniaassutigineqareernerata kingorna aningaasaqarnermut ataatsimiititaliamut Kommunalbestyrelsimullu akuerisassanngorlugu ingerlateqqinneqassasoq

Ilinniartitaanermut Kulturimut Sunngiffimmullu ataatsimiititaliami suliap suliarinera

Ilinniartitaanermut Kulturimut Sunngiffimmullu ataatsimiititaliap novembarip 5-ani 2012-imi suliaq suliarivaa.

Allaffeqarfimminngaannit suliasatut tiguneqartariaqarpoq, ilinniartitsisunut paasititsiniassaq ingerlattussanngorlu.

Nunaqarfinni atuarfinni siulersuisoqarnikkut ajortoortoqassappat, nunaqarfinni aqutsisut pisinnaatitaaffilerneqassasut.

Innersuussutigineqartoq akuerineqarpoq.

Imm. Aningaasaqarnermik ataatsimiititaliamut Kommunalbestyrelsimullu ingerlaeqqqinneqassaaq.

**Innersuussut**

Kommunalbestyrelsimut innersuussutigineqarpoq

Meeqqat atuarfiisa aqunneqarnerinut ileqqoreqqusanut siunnersuut aaqqiissutit ilanngullugit akuersissutigineqassasoq.

Aqutsisoqatigiit aaqqiissutissanut atatillugu innersuussutaat malinneqassasut

Ilanngussat ataavartumik saqqummiunneqassasut

**Aalajangiineq**

**Ilanngussat**

1. Qeqqata kommuniani meeqqat atuarfiisa aqunneqarnerini ileqqoreqqusanut siunnersuut.

Minngortuunnguup Atuarfianit tusarniaanermut akissut

Nalunnguarfiup Atuarfianit tusarniaanermut akissut

Atuarfik Kilaseeraq-mit tusarniaanermut akissut

Atammik Atuarfianit tusarniaanermut akissut

Kangaamiut Atuarfianit tusarniaanermut akissut

## **Imm. 12 Nunaqarfinni aqutsisut aaqqissuussaaneri aammalu ilaasortat amerlassusii**

*Journalnr. 01.10.00*

### Tunuliaqutaq

Nunamut Namminermut, Pinngortitamut Avatangiisinullu Naalakkersuisoqarfiup KANUKOKA-llu atorfilittaasa ulloq oktobarip tallimaani 2012-mi ataatsimeeqatigiinneranni nunaqarfinni aqutsisut sorliit ataatsimoorussamik aqutsisuussanersut aqutsisullu amerlassusissaat kommunalbestyrelsip ukioq qinersiffiusoq sioqqullugu ukiup naanginnerani aalajangiiffigeriissagaa, kommuninut eqqaasitsissutigineqarnissaat eqqartorneqarsimavoq.

Qeqqata Kommuniani nunaqarfinni aqutsisut allakkatigut oktobarip 21-iani 2012-mi tusarniaaffigineqarput.

### Maleruagassatigut tunngavissat

Kommunit aqunneqarnerat pillugu Inatsisartut inatsisaat nr. 22. 18. November 201-meersup § 51. Imm. 1 naapertorlugu: ". ... *kommunalbestyrelsip aalajangersassavaa nunaqarfiit sorliit ataatsimoorussassaminnik aqutsisoqartinneqassanersut, aammalu pingasunik tallimanilluunniit ilaasorta-qassanersut. Aalajangerneq pissaaq ukioq nunaqarfinni aqutsisunik ataatsimoorussamik qinersiviususaq sioqqullugu, ukiup naanginnerani.*"

### Pissutsit atuuttut

Qeqqata Kommunian Ikaarsaariarnermi ataatsimiititaliap nunaqarfimmiut tusarniaaffigalugit isumasioqatigiisereerneratalu kingorna nunaqarfimmiut namminneq siunnersuutaat ataatsimiinnermini ulloq 19. november 2008 tapersorsorlugit imatut aalajangiipput:

- Itilleq Sarfannguillu ataatsimoortumik aqutsisoqalissasut tallimanik ilaasortalimmik.
- Atammik Napasorlu ataatsimoortumik aqutsisoqalissasut tallimanik ilaasortalimmik.
- Kangaamiut allanik kattuteqateqassanngitsut, nunaqarfimmilu aqutsisunut ilaasortat tallimaaniit pingasunut appartinneqarlutik.
- Kangerlussuaq allanik kattuteqateqassanngitsaq, ilaasortallu ullumikkutut amerlassuseqaanarlutik pingasuussasut.

Nunaqarfinni aqutsisut tusarniarneqarput aqutsisut aaqqissuussaanerat aammalu amerlassusertik isummerfigeqqullugu.

Ataatsimoortumik nunaqarfinni aqutsisut Atammik/Napasorlu ulloq novembarip 7-iani 2012-mi ataatsimiinnerminni aalajangerneqarpoq ullumikkutut ingerlaannartoqassasoq. Tassa nunaqarfiit marluullutik kattuteqateqassasut tallimanillu ilaasortalimmik.

Ataatsimoortumik nunaqarfinni aqutsisut Itilleq/Sarfannguillu ulloq 19. november 2012-imi ataatsimiinnerminni, Ikaarsaariarnermi ataatsimiititaliap 2008-mi aalajangersimanerata atuutiinnarnissaa aalajangerpaat ilaasortallu tallimaanissaat.

Kangaamiuni nunaqarfimmi aqutsisut ulloq 21. november 2012-imi ataatsimiinnerminni aalajangerpaat, nunaqarfimmi aqutsisut ilaasortaasa amerlassusaat pingasuuginnassasut.

Kangerlussuarmi aqutsisut ulloq noverbarip 23-iani 2012 allakkatigut ilisimatitsippot nunaqarfinnik allanik kattuteqarani ullumikkutut ingerlaannassasoq aammalu ilaasortaasa amerlassusii pingasuuginnassasut. Isummernerminnut tunngaviusimavoq innuttaassut tusarniaaffigineqarsimane-rat, innuttaasullu oqariartuutigigaat maannamut pissutsit aallaavigalugit taama inissisimasoqaanna-rallassasoq. Innuttaasut ikinnerussuseqartut ilaasortat tallimanut qaffaanissaat kissaatigisimagalu-arpaat Kangerlussuup annertuumik suliffeqarfiunera peqqutigalugu.

#### Atuilluartuunerup kingunerisinnaasai

Soqanngilaq

#### Aningaasaqarnikkut allaffissornikkullu kingunerisinnaasai

Aqutsisut amerlassusii aammalu ilaasortaasa amerlassusii allannguuteqanngimmata arlaatigut kinguneqartussaannngilaq.

#### Qullersaqarfiup oqaaseqaatai

Soqanngilaq

#### Allaffeqarfiup naliliinera

Qeqqata Kommuniani nunaqarfimmi aqutsisut qinigaaffimmi kingullermili (2009-minngaaniik) misilittagaqarfigillualereerpaat ilaasa ataatsimoorussamik aqutsisuuneq marlullu inuttoqqussusertik aallaavigalugu kisimiillutik aqutsisuunneq. Misilittakkatik aallaavigalugit aqutsisut akissutaat innersuussutigalugit allaffeqarfiup innersuussutigissavaa akuereqqullugit.

#### **Innersuussut**

Allaffeqarfiup kommunalbestyrelsimut akuereqqullugit innersuussutigissavai:

1. Itilleq Sarfannguillu massakkt aqqissuussaanerat ingerlaannassasoq tallimanillu ilaasoqarluni.
2. Atammik Napasullu massakkt aqqissuussaanerat ingerlaannassasoq tallimanillu ilaasoqarluni.
3. Kangaamiuni massakkt aqqissuussaanerat ingerlaannassasoq pingasunik ilaasoqarluni.
4. Kangerlussuaq massakkt aqqissuussaanerat ingerlaannassasoq pingasunik ilaasoqarluni.

#### **Aalajangiineq**

#### **Ilanngussaq**

2. Tusarniaalluni allakkat ulloq 21. oktober 2012-imeersaq
3. Itilleq/Sarfannguanilu aqutsisut akissutaat 9. november 2012-imeersut
4. Atammik/Napasumilu aqutsisut akissutaat 16. November 2012-imeersut
5. Kangerlussuarmi aqutsisut akissutaat 23. November 2012-imeersut
6. Kangaamiuni aqutsisut akissutaat 23. November 2012-imeersut.

**Imm. 13 Sukisaarsaatigalugu aalisartartunik (eqalunnik) aalisartitsinissamut akuersissuteqartarnerup killiligaanera**

Journalnr. 72.00

Tunuliaqutaq

Kommunalbestyrelsi februaarip 28-ni 2012-imi ataatsimiinnermini kuuittulliuttut aalisartitsivissatut (eqalunnik) akuerisissuteqarfiusinnaasutut innersuussutiginikuuai:

Eqalulik (*Ukiiviup avannaatungaani*)  
Eqalusussuit (*Isortoq*)  
Erfalik (*Itillip kujataatungaani*)  
Napiarissat (*Itillip kujataatungaani*)  
Angujaartorfik (*Kangerlussuaq*)  
Kangia (*Napasup timaatungaani*)  
Qooqqut (*Napasup timaatungaani*)  
Amitsuarsuk (*Napasup timaatungaani*)

Namminersorlutik Oqartussat kuuittulliuttut aalisartitsivissatut innersuussutaasut eqqarsaatigalugit kommuninut nunap assinginik nassinneqarnissartik qinnutigivaat. Tamakku aalisartitsisinaanermut akuersissuteqarnermi ersarissumik nalunaaqutserlugit atugassarissagamikkit, tassa sumiiffit sumiinneri killilerlugit.

2012-imi decembarip qiteqqunnerani akuersissutit agguanneqartussaapput.

Maleruagassatigut tunngasvissaq

Sukisaarsaatigalugu aalisartunik aalisartitsinermut akuersissuteqartarneq pillugu Inatsisartut inatsisaat nr. 20, 22. november 2011-imeersoq.

Pissutsit atuuttut

Namminersorlutik Oqartussat kommuni tullerriiarissasoq qinnuigivaat, kommunillu tullerriiarinera imaappoq:

<b>Kuuk</b>	<b>Sumiiffik</b>	<b>Gps-ikkut naleqqat</b>
1. Kangia	<i>Napasup timaaniittoq</i>	65°18 N 51°58 W
2. Angujaartorfik	<i>Kangerlussuaq</i>	66°42 N 51°28 W
3. Erfalik	<i>Itillip kujataaniittoq</i>	66°26 N 53°36 W
4. Napiarissat	<i>Itillip kujataaniittoq</i>	66°24'2 N 53°37 W
5. Qooqqut	<i>Napasup timaaniittoq</i>	65°12 N 52°06 W
6. Eqalusussuit	<i>Isortoq</i>	67°22 N 53°03 W
7. Eqalulik	<i>Ukiiviup avannaaniittoq</i>	67°17'5 N 53°48 W
8. Amitsuarsuk	<i>Napasup timaaniittoq</i>	65°12 N 52°00 W

Namminersorlutik Oqartussat aallaqqaammut kuuittulliuttut neqeroorutiginiarlugit kommunimut nalunaarutigivaat:

1. Kangia Napasup timaaniittoq
2. Angujaartorfik Kangerlussuaq
3. Qooqqut Napasup timaaniittoq
4. Eqalulussuit, Isortoq
5. Eqalulik Ukiiviup avannaaniittoq

Kommunip Namminersorlutik Oqartussat sooq tamatut neqerooruteqarfinnittumik tullerriiarisimanersut apeqquteqaatigiffivai, kommunimi taamatut tullerriiarinikuunngimmat.





Kommunillu tulleriiaarinermini uppernarsaatissat annertunerusut nassiuteqqinnikuullugit. Takuuk ilanngussaq 9.

Namminersorlutik Oqartussat kommunip kuuit arfineq-pingasut innersuussutigisai pillugit nunap assingini nassiusseqqunikuuat, pingaaruteqarmat nuna pineqartup nunap assingini ersarissumik killilerlugit titarneqarsimanissaat.

Tamatuma malitsigisaanik aalisarnermik siunnersortit Inuutissarsiornermik allatseqarfik ikiortigalugu, takornarialerisut kuunnik aalisartitsivissatut neqeroorutaasut pillugit nalunaarsuutaat pissarsiarinikuuat.

Atammik Napasumi nunaqarfinni aqutsisut Kangiani, Qooqquni Amitsuarsummilu kuuit neqeroorutaanissaannut titartarneqarsimasut ajorinngilaat.

#### Kangia eqqarsaatigalugu

Nunap assinga ilanngussaq 1-tut ilanngussaavoq, akuersissuteqarfiusinnaasussatut annertussusissaa ilanngullugu. Nunap assinga atortussiaq Maniitsoq Adventure Camps ApS peqatigalugu suliaavoq. Maniitsoq Adventure Camps ApS Kangiani illuaraateqarpoq, taakkulu sukisaarsaatigalugu aalisartitsinermit atugaanerusarlutik.

#### Angujaartorfik eqqarsaatigalugu

Nunap assinga ilanngussaq 2-tut ilanngussaavoq, akuersissuteqarfiusinnaasussatut annertussusissaa ilanngullugu. Nunap assinga atortussiaq Kangaamiuni nunaqarfinni aqutsisut, piniartut aalisartullu Kangaamiuni peqatigiiffiat taamatullu aalisartitsisinnaanissamik qinnuteqartussatut ilimagisat peqatigalugit suliaavoq.

#### Erfalik eqqarsaatigalugu

Nunap assinga ilanngussaq 3-tut ilanngussaavoq, akuersissuteqarfiusinnaasussatut annertussusissaa ilanngullugu. Sirius Greenland kuup qanittuani illuaraatteqarpoq, taannalu sukisaarsaatigalugu aalisartitsinermit atorneqartarluni. Nunap assinga atortussiaq SIRIUS peqatigalugu suliaavoq.

#### Napiarissat eqqarsaatigalugit

Nunap assinga ilanngussaq 4-tut ilanngussaavoq, akuersissuteqarfiusinnaasussatut annertussusissaa ilanngullugu. OutDoor Adventure of Greenland-ip paasissutissiissutigivaat juulimi, aggustimi septembarimilu kuuk tamakkerlugu tatsit Napiarissat tungaannut aalisartitsivittut atortarlugu.

#### Qooqqut eqqarsaatigalit

Nunap assinga ilanngussaq 5-itut ilanngussaavoq, akuersissuteqarfiusinnaasussatut annertussusissaa ilanngullugu. Nunap assinga atortussatut Major Hunter-ikkut peqatigalugit suliaavoq. 2009 Major Hunting-ikkut Qooqquni pingasunik illuaqqiornissaminut akuersissummik tunineqarput, massakkumullu illuaqqat marluk aneraasaartarfillit, anartarfeqarfillit puorivilerlugit naammassineqarsimallutik. Illuaqqat kuup akuaniit 250 meterisut ungasitsigisumiippat. Nunap assinga ilanngussaq takuuk.

#### Egalusussuit eqqarsaatigalugit

Nunap assinga ilanngussaq 6-itut ilanngussaavoq, akuersissuteqarfiusinnaasussatut annertussusissaa ilanngullugu. Nunap assinga SIRIUS Greenland peqatigalugu suliaavoq.

#### Egalulik eqqarsaatigalugu



Nunap assinga ilanngussaq 7-itut ilanngussaavoq, akuersissuteqarfiusinnaasussatut annertussusissaa ilanngullugu. Nunap assinga SIRIUS Greenland peqatigalugu suliaavoq.

Amitsuarsuk eqqarsaatigalugu

Nunap assinga ilanngussaq 8-tut ilanngussaavoq, akuersissuteqarfiusinnaasussatut annertussusissaa ilanngullugu.

Atuilluartuunissakkut kingunerisinnaasai

Kuuit akuersissuteqarfiusut eqqarsaatigalugit nunap assiliorneq pitsaasuvoq, taamaalillunimi atuisut tamarmik suut pineqarnersut takusinnaassammassuk, taamatuttaarlu akuersissummik pigisaqar-toq kuup eqqaanik eqqiluutsuutitsinissaminik kusanartuutitsinissaminillu pisussaaffeqassammat.

Aningaasaqarnikkut allaffissornikkullu kingunerisinnaasai

Immikkut oqaaseqaatitassaqaanngilaq.

Qullersaqarfiup oqaaseqaataa

Immikkut oqaaseqaatitassaqaanngilaq.

Allaffeqarfiup naliliinera

Allaffeqarfik naliliivoq, nunap assingi ilanngussat takornarialerisut pitsaasumik soqutiginarumillu eqalunniartitsivissamik neqerooruteqarsinnaanermi pisariaqartitaanik naammassinnittuusut, taamalu takornariatoqarsinnaassalluni takonarissat kissaataat naapertorlugu atuisunik allanik akornusersuutaanngitsumik.

**Innersuussut**

Allaffeqarfiup kommunalbestyrelsimut akuereqqullugu innersuussutigissavaa:

- kuuit aalisartitsiviusinnaasutut akuersissuteqarfiusinnaasut nalunaarsorneri.

**Aalajangiineq**

**Ilanngussat**

- 1 Kangiani nunap assinga
- 2 Angujaartorfimmi nunap assinga
- 3 Erfalimmi nunap assinga
- 4 Napiarsissani nunap assinga
- 5 Qooqquni nunap assinga
- 6 Eqalussussuni nunap assinga
- 7 Eqalulimmi nunap assinga
- 8 Amitsuarsummi nunap assinga
- 9 Tulleriaarnermi pingaarnersuinermit kommunip 26.09.2012-mi tunngavilersuutai



**Imm. 14 Imigassanik sassaallersinnaanermut Type B qinnuteqaat – Sanati Service A/S, Butik-Café 61, B-608, Sisimiut**

*Journalnr. 70.06.02*

Tunuliaqutaq

Novembarip 1-ni 2012 Butik-Café 61, Sisimiut imigassanik aalakoornartortalinnik sassaallersinnaanermut akuersissummik qinnuteqarpoq.

Maleruagassatigut tunngavigisat

Imigassanik aalakoornartortalinnik nioqquteqartarneq sassaallertarnerlu pillugit Inatsisartut inatsisaat nr. 11, 11. november 2000-imeersoq.

Inatsimmi kapitali 2 naapertorlugu imigassanik aalakoornartortalinnik kimittuunik kimikitsunilluunniit nioqquteqassagaanni sassaalliissagaanniluunniit taakkununga akuersissummik pigisaqarnissaq piumasqaataavoq, soorluttaaq akuersissut kommunalbestyrelsimit tunniunneqartussaasoq inimullu ininulluunniit aalajangersimasunut tunngatinneqartussaalluni.

Allaffeqarfiup innersuussutaa

Piumasqaatit eqquutsinneqarmata akuerisassanngorlugu innersuussutigineqassaaq.

**Innersuussut**

Kommunalbestyrelsimut innersuussutigineqassaaq, Sanati Service A/S, Butik-Café, B-608, akuersissummik tunineqassasoq, ukiuni pingasuni atuuttussamik.

**Aalajangiineq**

**Ilanngussaq**

Ilanngussaqanngilaq

**Imm. 15 2012-mi qipoqqarsinnaanermut akuersissutip kommunip iluani nuunneqarnissaa pillugu aalajangiineq pillugu paasissutissiissut**

*Journalnr. 72.01.01.01*

Tunuliaqutaq

Ulloq 26. April 2012 kommunalbestyrelsip aalajangiineratigut qipoqqarniarnermi piniaqataasussatut akuersissummik tunineqartoq, angallat Kangaamiuni angerlarsimaffeqartoq, GR 7-190 ”Tiu-T, ulloq 22. oktober 2012 nalunaaruteqarpoq ukioq manna piniaqataasinnaajunnaarluni angallatip ajoquteqalernera pissutigalugu. Tamanna pillugu piniaqataalluni qipoqqarsinnaanermut akuersissut tunniunneqarsimasoq taanna, kommunip iluani nuunneqarneratigut piniaqataasussamut allamut tunniunneqarnissaa matumani aalajangiiffigineqassaaq.

Maleruagassatigut tunngavissat

Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 11, 16. juli 2010-imeersoq.

Pissutsit atuuttut

2012-imut Qeqqata kommunianut qipoqqartassiissutit pingasut kommunalbestyrelsemit ulloq 26. April 2012 agguanneqarput Aqutsivik Sisimiut-nut akuersissut ataaseq Aqutsivik Maniitsoq-mullu akuersissutit marluk tunniunneqarlutik.

2012-imi Aqutsivik Maniitsoq-mut qipoqqartassiissutit marluk angallatinut ukununnga tunniunneqarput:

- Akuersissut(licens) ataaseq piniaqatigiit **Maniitsumi** angerlarsimaffeqartunut GR 7-226 ”Basse” aamma GR 7-60 ”Palleq”-mut tunniunneqarpoq,
- Akuersissut ataaseq piniaqatigiit **Kangaamiuni** angerlarsimaffeqartunut GR 7-259 ”Daniali” aamma GR 7-190 ”Tiu-T”-mut tunniunneqarpoq.

2012-imi Aqutsivik **Sisimiut-nut** qipoqqartassiissut ataaseq angallatinut piniaqatigiinnut ukununnga tunniunneqarpoq:

GR 8-303 ”Eli Fontaine” aamma GR 8-85 ”Angajunngua”,

Maniitsumi piniaqatigiit qipoqqaq pisaraat 1. maj 2012.

Kangaamiuni piniaqatigiit qipoqqartassaq maannamut suli pisarinngilaat.

Sisimiuni piniaqatigiit qipoqqartassaq maannamut suli pisarinngilaat

GR 7-190 Tiu-T-mik piginnittup(Kangaamiut) ulloq 22.10.2012 nalunaarutigivaa ukioq manna piniarnermi peqataasinnaajunnaarluni angallat akseliarluni aserortooqqammat.

GR 7-259 Daniali-mik piginnittup, Kangaamiuni akuersissut piginnarusuppaa Maniitsumilu qamutilillit marluk arlaat GR 7-226 Basse imaluunniit GR 7-60 Palleq piniaqatigerusussinnaallugu nalunaarutigalugu.

Qipoqqarnik piniarnermi inatsisitigut piumasaqaataavoq angallatit qamutilillit minnerpaamik 36 fod-itut angissusillit marluk piniaqatigiinnissaat.

GR 7-226 Basse-p aamma GR 7-60 Palleq-p saniatigut angallatinik allanik Maniitsumi qamutiqartoqannngilaq.

Kangaamiuni angallatit qamutilillit marluk allat taamaallaat 30 aamma 31 fod-itut angitigigamik qipoqqarniarnissamat piumasaqaatinik naammassinninngillat.

Kangaamiunit saaffiginnissut tunngavigalugu Piniarnermut naalakkersuisoqarfimmut Qeqqata kommuniani allaffeqarfik apeqquteqaateqarmat Naalakkersuisoqarfimmit akissutigineqarpoq Kangaamiuni angallatit 30 aamma 31 fod-it arlaat qipoqqarniarsinnaanermut immikkut akuersissummik tunineqarsinnaanerat inatsisitigut periarfissaqanngitsoq.

Taamaammat GR 7-259 Daniali-p akuersissut tigummiinnassappagu angallat piniaqatissaa Maniitsuminngaaneertariaqarpoq imaluunniit Sisimiuninngaaneertariaqarluni.

GR 7-226 Basse-mut piginnittoq qipoqqarmik piniaqataanissamat soqutiginnippoq.

GR 7-60 Palleq-mik piginnittoq nalunaaruteqarpoq piniaqataarusunnani..

Arfernik angisuunik illersuineq piniarnerlu pillugit nalunaarummi § 24-imi akuersissutinik agguaasseqqinneq aalajangersarneqarpoq:

**§ 24.** ”Kommunalbestyrelsi najukkami aalisartut piniartullu peqatigiiffiat tusarniaavigereerlugu aalajangiisinaavoq akuersissut tunniunneqarsimasoq imaluunniit akuersissutit tunniunneqarsimasut kommunip iluani nuunneqassasut imaluunniit atorunnaassasut.”

Piffinni qamutiqarfiusuni Sisimiuni, Maniitsumi aamma Kangaamiuni aalisartut piniartullu peqatigiiffii suliasaq pillugu § 24 naapertorlugu tusarniaaffigineqarnerini peqatigiiffiit imatut oqaaseqaateqarput:

Maniitsoq:

Manitsumi aalisartut piniartullu peqatigiiffiata oqaaseqaataani 25.10.2012-meersumi oqaatigineqarpoq qipoqqartassiissutip aqutsivik Maniitsumi pigiinnarnissaa pillugu piukkullugu Jens Meeraq Lyberth (GR 7-259 ”Daniali”) aamma Nathan Josefsen (GR 7-226 ”Basse”) akuersissummik tunineqassasut.

Kangamiut:

Kangaamiuni aalisartut piniartullu peqatigiiffiata oqaaseqaataa 26.10.2012-meersoq:

”Qipoqqaq maani pigiinnarneqarusuppoq taamattorli akuersissummik piginnittup aappaa ukioq manna pisinnaanani nalunaarsimalluni. kiisalu ajoraluartumik maani qamutilillit marluk piumasaqaatinut mikivallartutut isigineqarlutik akuersissummik nuussinisaq ajornartitaammat tamanna uggornarpoq naak qipoqqartareernikuugaluartut.

Akuersissummik piginnittup aappaa Jens M Lyberth (GR 7-259 Daniali) piniaqatissamik utaqqiinnartutut nalunaarsimavoq namminerlu nukingisaarisimagaluarluni taamaattumik Nathan Josefsen (GR 7-226 Basse) piumappat arlaralugu piniarsinnaalluni taanna piumasaqaatinut angummammat.

Sisimiut:

Oqaaseqaateqanngilaq.

### Allaffeqarfiup naliliinera

Allaffeqarfiup nalilerpaa Qeqqata kommunianut qipoqqartassiissutit marluk sinneruttut ukiup naannginnerani tamarmik pisarineqarnissaat periarfissaqarnerussasoq pisassiissutip aappaa Aqutsivik Sisimiut-ni pisassiissutillu aappaa Aqutsivik Manitsoq-mi pigiinnarneqarnissaat aalajangiusimaneqarpat. Tamanna pillugu Allaffeqarfiup nalilereerluni Aqutsivik Maniitsoq-mut pisassiissut Kangaamiuni piniangatigiinnutt GR 7-259 "Daniali"-mut aamma GR 7-190 "Tiu-T-mut upernaag tunniunneqarnikuusoq akuersissutip (affaata) nuunneqarneratigut piniangatigiittussanut GR 7-259 "Daniali", Kangaamiut, aamma GR 7-226 "Basse"-mut(Maniitsoq) tunniunneqassasoq Allaffeqarfimmit innersuussutigineqarpoq.

### Allaffeqarfiup innersuussutaa

Innersuussutigineqarpoq:

Aqutsivik Maniitsoq-mut pisassiissut / akuersissut GR 7-259 "Daniali"-mut aamma GR 7-190 "Tiu-T-mut upernaag tunniunneqarnikuusoq akuersissutip kommunip iluani nuunneqarneratigut piniangatigiittussanut GR 7-259 "Daniali" aamma GR 7-226 "Basse"-mut tunniunneqassasoq.

### Borgmesterip suliamik suliarinninnera

Innersuussut oktobarip 26-ani 2012-imi borgmesterimit akuerineqarpoq.

### **Innersuussut**

Suliaq kommunalbestyrelsimut paasissutissatut saqqimmiunneqarpoq.

### **Aalajangiineq**

### **Ilanngussat**

1. Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 11. 16. juli 2010-imeersoq.
2. Maniitsumi aalisartut opiniartullu peqatigiiffiata oqaaseqaataa 25.10.2012-meersoq.  
Kangaamiuni aalisartut piniartullu peqatigiiffiata oqaaseqaataa 26.10.2012-imeersoq.

**Imm. 16 Inatsisartut peqqussutaata nr. 12-ip, 19. november 2007-imeersup allangortinneqarnissaanik siunnersuutip tusarniutigineqarneranut akissuteqaat pillugu paasissutissiissut**

*Journalnr.*

Tunuliaqutaq

Inatsisartut allattoqarfiat mailikkut 2012-imi oktobarip 25-aneersutigut, EM 2012/55 innersuusutigalugu, Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaata nr. 12-ip, 19. november 2007-imeersup allangortinneqarnissaanik tusarniummut kommuni akissuteqarfigeqquaa. Akissuteqaat kingusinnerpaamik 2012-imi novembarip 8-ni nassinneqarsimassaaq.

Maleruagassatigut tunngavissat

Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu Inatsisartut peqqussutaat nr. 12, 19. november 2007-imeersoq.

Pissutsit atuuttut

Attartortitaq attartortumit pisiarerusunneqarnerani, attartugaq niuernermi nalinga aallaaviginagu teknikkikkut aningaasatigullu nalilerneqarnera aallaavigalugu tunineqartalernissaanik kissaateqarlutik, Inatsisartunut ilaasortat Malik Berthelsen aamma Kim Kielsen inatsisartut peqqussutaata allangortinneqarnissaanik siunnersuuteqarnikuupput.

Attartukkat pisiarineqarnissaani niuernermi nalinga aallaavigalugu tunineqartarnissaannik maanakkut aalajangersagaq atuuttoq naapertorlugu pingaartumik Nuummi, Sisimiuni, Ilulissani Qaqortumilu tunisinermi teknikkikkut nalinga qaangingaatsiarlugu inissiat nutaanngitsut tunineqartarnerat, siunnersuuteqartut allannguutissatut siunnersuuteqarnerminni tunngavigaat.

Tamatuma saniatigut siunnersuuteqartut maluginiaqqaat, allannguutissatut siunnersuutigineqartoq illoqarfinni annerni attartortunut kisimi iluaqutaassanngitsaq, tassungalu atatillugu Namminersornerullutik Oqartussat kommunillu inissiaataasa attartortittakkat pigisatut inissiangortissinnaanerat pillugu inatsisartut peqqussutaata allangortinneqarneranik inatsisartut peqqussutaat nr. 6, 15. april 2003-meersumi § 8 imm. 5 innersuusutigalugu. Aalajangersagaq taanna naapertorlugu Naalakkarsuisut aalajangersinnaapput, tuniniaanermi pissutsit unioqqutinngit tunisisoqarsinnaatillugu § 8-mi imm. 2-mi aalajangersakkat malinnagit allamut akikinnerusumillu inissiat tunineqasasooq.

Siunnersuuteqartut allannguutissatut siunnersuuteqarnerminni, Namminersorlutik Oqartussanut aningaasaqarnikkut allaffissornikkullu kingunerisinnaasai, matumani siunnersuut akuerineqassappat inissianik tunisinermi isertittakkat appariaateqarnissaat naatsorsuutigineqartariaqartoq maluginiaqqaat.

Inatsisartut peqqussutaat nr. 12, 19. november 2007-imeersumi § 11-mi imm. 1-imi allassimavoq, inissiap attartortittakkap, inissiatut imaluunniit illutut nammineq pigisatut tiguneqartussatut kissaatigineqartup tunineqarnerani akiusooq niuernermi naligititaasut naapertorlugit aalajangerneqasasooq.

§ 11-imi imm. 2-mi aalajangersagaqarpoq, tunisinermut akiusup procentianik annertussusilikkamik akikillisaaffigineqassasut, tassani attartortup qanoq sivisutigisumik attartorsimanera apeqqutaatinneqassalluni, tak. imm. 3 aamma ilannussaq 2.

Attartortoq ukiuni tallimani amerlanerusuniluunniit attartortuusimaguni, tunisinermi akigitinneqartup procentianik annertussusilikkamik akikillisaaffigineqassaaq. Assersuutigalugu ukiuni tallimani ataannartumik attartortuusimaguni ilanngussaq 2 naapertorlugu 5 procentimik, ukiuni qulini ataannartumik attartortuusimaguni 15 procentimik, ukiunilu 20-ni ataannartumik sinnerlugilluunniit attartortuusimaguni 35 procentimik akikillisaaffigineqassaaq.

#### Aningaasaqarnikkut allaffissornikkullu kingunerisinnaasai

Allannguutissatut siunnersuut akuersissutigineqassappat naatsorsuutigiineqassaaq, soorlu siunnersuusiortut takorluugaattut, aallaqqaataani inissianik tunisinermi isertitassat appariaateqarsinnaassat. Taamaakkaluortoq tunisinermi akigititat appariarnerisigut attartornermiit piginnittuunermut soqutiginninneq annertusissasoq, taamaalilluni isertitat annertusissasut miserratisaanngilaq. Allaffissorneq eqqarsaatigalugu allannguutissatut siunnersuut akuersissutigineqassagaluarpat annertuumik kinguneqaateqarnissaa naatsorsuutigiineqanngilaq.

#### Allaffeqarfiup naliliinera

Siunnersuuteqartut allannguutissatut siunnersuuteqarnermini, Namminersornerullutik Oqartussat kommunillu inissiaataasa attartortittakkat pigisatut inissianngartissinnaanerit pillugu inatsisartut peqqussutaata allanngortinneqarneranik inatsisartut peqqussutaat nr. 6, 15. april 2003-meersoq innersuussutigat. Allannguutissaq peqqussummut taamani atuuttumut, Namminersornerullutik Oqartussat kommunillu inissiaataasa attartortittakkat pigisatut inissianngartissinnaanerit pillugu Inatsisartut peqqussutaat nr. 5 21. maj 2002-meersumut, attuumassuteqassaaq. Inatsisartut peqqussutaat taanna, maannakkut Inatsisartut peqqussutaatigut nr. 12-ikkut, 19. november 2007-imeersutigut atorunnaarsinneqarpoq, tassani § 17-imi imm. 2-mi nr. 1-iatigut peqqussut 21. maj 2002-meersoq atorunnaarsinneqarmat, taamaalillunilu aamma 15. april 2003-mi allannguut atorunnaarsinneqarluni.

Allaffeqarfiup nalilerpaa, attartortunik tunisinissamik suliat aallartinneqartinnagit inissianik tunisinermi avataanit ilisimasalinnit nalilersuisitsisarnermi, inissiap teknikkikkut aningaasatigullu nalinga aallaavigineqartartoq. Attartortitsinermi akiliutissap naatsorsorneqarnissaanut Ineqarnermut, Attaveqarnermut Angallannermullu Naalakkersuisoqarfiup ilitsersuusiamini ima allassimavaa, ”Teknik-ikkut aningaasatigullu naliliinermi illuutit ullumikkut nalinganut sanilliunneqarsinnaavoq taamaatoq inississimanera isikkivialu ilanngunnagit.”

Taamatutaaq allaffeqarfiup nalilerpaa, maannakkut peqqussut atuuttoq naapertorlugu inissiap aserfallatsaaliorneqarsimanera, qanoq pisoqaatiginera, sumi inississimanera eqqarsaatigilluinnarlugit niuernermi nalinga piviusorsioortoq aallaavigalugu inissiaq akeqartinneqassasoq attartortut naatsorsuutigissagaat. Niuernermi nalingata saniatigut, attartortoq qanoq sivistigisumik attartorsimanera apeqqutaalluni 35 procenti tikillugu akitigut appaasoqartarpoq.

Naggataatigut ilanngullugu oqaatigineqarsinnaavoq, inatsisartut peqqussutaata nr. 12-ip, 19. november 2007-imeersup akuersissutigineqarnissaanut, taamani illut tunineqarnissaanut naliliinisami maleruagassat atuuttut naapertorlugit ”attartornermiit-piginnittuunermut” aaqqiineq naapertorlugu kommuni illuutiminik arlaqartunik tunisinikummat. 2007-imi novembarip 19-iata kingorna taamatut tunisisarneq annikilleriarnikorujussuavoq.



Allaffeqarfiup innersuussutaa

Borgmesterimut innersuussutigineqassaaq, allaffeqarfiup naliliinera naapertorlugu akissuteqartoqasasooq.

Borgmesterip suliamik suliarinninnera

Allaffeqarfiup naliliinera naapertorlugu borgmesteri 2012-imi novembarip 7-iani akissuteqarpoq.

Aalajangiineq pillugu aningaasaqarnermut ataatsimiititaliaq tullissaanik ataatsimiileruni ilisimatinneqassaaq.

Aningaasaqarnermi ataatsimiititaliap suliamik suliarinninnera

Aningaasaqarnermi ataatsimiititaliap novembarip 27-ani 2012 ataatsimiinnermini paasissutissiissut tusaatissatut tiguaa.

**Innersuussut**

Suliaq kommunalbestyrelsimut paasissutissatut saqqummiunneqarpoq.

**Aalajangiineq**

**Ilanngussaq**

Ilanngussaqaanngilaq

**Imm. 17 Tamalaat**

